

EHULELO YA MUKHORA

 Oreeiriwa okhala otapernakulu! Ni, yaari yoohiwehereriwa vakhani wa miyo. Miyo, kisuwelaka wira ohiy'ula waari ohiyu wa ekomunyawu, kweekwe okisivela, miyo kakhala-ru vakhiviru khula nippuro, okhalela mpante ekomunyawu. Okhala wira ti... Kinoona wira aKristu othene yaahaana ophavela waakhela ekomunyawu, okhala wira Yesu oohimya, "Mwaahikhuure, khamurina mpantte ni Miyo." Tivo, eyo e... kweekwe oreeriwa wuulupale wo—wo orwa mutapernakulu. Vano, ohiy'ula, Munna Neville ohimmye wira aahilala vammilo vakhani, ni—ni aatthuna wira kilavule ni muthukumano ahu. Miyo kimuleela wira kaamutthapela wira. Kaatthuna nave-tho ohimya wira vakhala...

² Meelo ohiyu muthukumano wa alopwana, maatinistratoore, meelo ohiyu, ni alipa a nakoso a okereja va, muthukumano aya woolimaleuya wa Sekunta ohiyu ni yawaya... ahaana ethanlelo yo wira ni mulipa-ooteka. Kinoona wira nyuwo othene munnisuwela saana wira awihu—awihu—ethokiheryo ahu yookupaliwa, ni ninoorowa owerya oteka ekereja. Nto siiso yookupaliwa, ni alakela enoopacerya esumana yeela. Ekereja empacerya esumana yeela, ntoko sinsuwelaaka. Ni khekupaliwe, weno oJeffersonville. Masi naaronwe oIndianapolis, estaatu, nto awo khunitthuniherya, vano ninrowa oteka. Nto siiso enoopacerya, khino, esumana yeela. Ninoosuwela nuumala muthukumano meelo ohiyu. Vano nto nuumala muthukumano meelo ohiyu, yaahipacerye esumana yeela, yakhumeleta ethu, mulipa-ooteka aahiwerye opacerya esumana yeela, nto onrowa opacerya esumana enttharelana.

³ Ni emalelo ya esumana ela enrwa, Saapatu ohiyu, Ttiminku voosiisu ni Ttiminku ohiyu, ya esumana enrwa, Esaapatu ela enrwa ni Ettiminku, Apwiya yathuna vale, kintthuna kikhala-tho mu—mu—muthukumano, ipante tthaaru, ntoko siiralyahu isumana vakhani sivinre. Vano nto nuumala hiyo... Eyo enrowa okhala Saapatu ohiyu, vano nto Ttiminku voosiisu, nto nuumala Ttiminku ohiyu. Ela enttharelana, mahiku anrowaaya okhala muloko ni mararu ni muluko ni maxexe a mweeri yoola.

⁴ Vano nto akina w'axinna ni miyo ninookhuma nuumala okathi yoowo, ninrowa oColorado, mukwaha w'orowa oxaya, nto ninoottika. Etapernakulu, yamalihwa vale, wakhala-ru otthuna w'Apwiya, kintthuna kikuxe, khino, esumana yoomalela kihinatthi okhuma-tho orowa mmithukumanoni, ni kilavule sa *Ikanyeryo Thanu na piili* sa Wiisuupulula. Okathi vakhani ohinatthi... Ntoko silavunlyaha sa *Okathi Mithanu na Miili wa Ekereja*, vano *Ikanyeryo Thanu na piili* wira sitthareke Yeeyo.

⁵ Ni alakela mwa isumana soophiyaka piili wala tthaaru sinttharelana, okhala wira kinoona wira enihimmwa wira, ni axilopwana anrowa oheliwa mmutekoni, awo anniwerya, hiyo ninoowerya oteka etapernakulu n'ukhalana mwa mahiku muloko, wala muloko ni mathanu, ethu ntoko yeeyo. Vano ninoorowa okhalana opuro w'okilaathi va woophiyaka vaara vaili wa atthu nirinaahu, wala vaara vararu, khino atthu oovikana. Nto mwaha wa yeeyo kaalipelelaaka mpakha okathi yoowo.

⁶ Okhala wira, Esaapatu yookiserya ni Ttiminku, yaari yookattyamiha, moosuwela. Atthu yeemenle va iwoora piili sa oxekuwa, wira esarye etapernakulu, ekereja hata ehinatthi ohuliwa. Voosiisu aya, ewoora yaneethanu, nfurumeera onkhala vakhiviru ni miyo, arwaaka okhuma weiwo, khwira, "Yaahikhala atthu yaasanrye otapernakulu wothene ewoora ya neethanu voosiisu." Tivo, vano nto atthu, yaarwaaka, khuhikhala opuro, vano awo anoovolola ni anoorowa. Ni—ni nto ale aneemela, ni oothukumanyeya ankhala oophunyana munvireloni, anisoona okhala oophunyana, ni sothene. Ni kinniwoona athiyana yeemenle-ene vale, eviheriwaka, moosuwela, siiso, ni oviheriwa okhoowaka. Nto mulopwana onoovenya khunvaha muthiyana, ekhatera awe; vano nto owo onamweemela mpakha metto sawe owereya, nto mutthu mukina onoonvaha opuro. Moosuwela, ni siiso, ni ti yoowooniha othunku, ni aximai n'anamwane aretta ni sikina, ti yoonanana.

⁷ Tivo, nimphavela omaliha eyo vano nitekaka etapernakulu yuulupale saana. Ni ninookhalana nipuro nooreera vaavo anamwane, imaara sikina...ni anthikilehaaya, ntoko anamwane axikhaani yinlasaka; ahe, ninrowa okhalana opuro wa yeeyo, wira aximai eweryeke okela, nlelo ekhaleke mmutekoni w'okokhorela, ni enaamulaleeriwa musaala. Ni okhalana isaala sa exikola ya Ttiminku ni sothene sooreheriwa ntoko sintthuneyaya okhala. Nto eyo, Apwiya yatthuna vale, eniiraneya, esumana ela enrwa.

⁸ Nyuwo othene moothanla ipursentu emiya yeeyo, tivo ninkhala ni yeeyo, moone. Ekereja ti yootaphuwa. Etthu ekereja enihimyaaya, ti yeeyo. Maatiministratoore wala mutthu mukina...Maatiministratoore arina, khula mmosa, mwaathanle mmosa. Pastore orina mwaathanle mmosa. Ti ekereja, iwo ti—ti elamulelo ya ekereja, eyuulupale ya ekereja. Ekereja, mwa yothene, ennilavula. Ti yeeyo tu. Ni enninisivela eyo, okhala wira hiyo khanrina mapixipu wala ikhalelo s'oruma wala anamwaawehaxaxa atthu othene ni siiso wira enileelete *ela, ele*, wala *ekina*. Ti Erooho Yoowaarya mukereja, enlavula. Okisivela yoorumma eyo, ni ti yooreera saana.

⁹ Ni kaahikoha, "Nyuwo othene munthhuna mulipelele mpakha nikhalane voophiyerya wira nithamihe etapernakulu voopuronni niteke ekereja yuulupale?" Eyo yaari munikhuruni

na maatiministratoore, ni khiyaakhanle oomaliheriwaka ni maatiministratoore. Vano nto awo khukivekela, ntoko mulipaoowehexaxa, wira kirwe kikohe ekereja. Vano miyo khwira, “Vano nihaana musurukhu oniphiyerya wira naacerereye munnuwelo wa ekereja ni okhalika sothene voovirikana, ni itthu sothene, ovikana ele hiyo naarinaahu.” Miyo khwira, “Vano ninoowerya wira yeeyo naanaanoru, wala osuka musurukhu ahu mpakha niphwanye woophiyerya wira niteke ekereja yoomalela, esya, nipuro nikina.”

¹⁰ Vano hiyo khumpaka mwaathanle wa yeeyo mukereja, ni khuthanliwa voowiiwanana wira “niteke ekereja naanaano va, ni waari paahi oteka ekereja yuulupale saana naanaano va.” Ni nikhanle ni yeeyo.

¹¹ Ni nikhuru va oJeffersonville khuhineemererya, khwira wira khinaakhanle wiiraka. Vano hiyo khuvira vasulu vaya, khurowa oIndianapolis khukeliha Estaatu mwa yeeyo. Vano nto awo khwaakhula, wira, “mutekeke,” nookhalana weemereriwa wira niteke. Vano nto epooma kherina-vo etthu vano, ti Estaatu erinavo etthu. Vano nto hiyo nookhalana otthuniheriwa, ni namateka ookhalana e—elisensa mmataatani naanaano va, ni miyo kinoona wira awo aalikana wira epacerye okathi p’ukathi.

¹² Ela meelo ohiyu, na—namateka ahimya wira ontthuna opacerya esumana enrwa, vano kinoohiya paahi mithukumano wa e...mpakha niphiyerye *Ikanyeryo Thanu na piili*. Vano nto vakhala wira namateka khonwerya opacerya esumana enrwa, vano Ettiminku enttharelana, Saapatu ni Ttiminku, kinookhalana muthukumano kihinatthi orowa.

¹³ Vano nto kaarowa okhalana Ettiminku yeela, vano nto khusuwela wira ohiy’ula waari ohiyu wa ekomunyawu, tivo kihiya Ettiminku ila. Okhala wira, ni atthu anci-ene, khivanweryaneyea waakhela ekomunyawu voowiitthyaaleya, vano nakhalanaru ekereja yuulupale saana ninoowerya.

¹⁴ Vano, nookhalana Mukhulupale onoorwa. E...oh, moosuwela enihimy’aka, enoovahiwaru emusi Hickerson woohikhala khalayi. Ni munn’ihu okhanle napiyaano, owo arwe anivahé erumihelo vakhani vapiyaanoni, ya “Mwaaruuhe,” xontte, wala nsipo nlo naamukhaani ntoko siiso. Mwaamulopwana ola mwa emusi Hickerson, ohireere owehereriwa okathi munci-ene, oophiya. Mwammiravo mmosa ooreera murima, ni owo vekekhai nniya wa aHickerson. Ni awo othene maniya wa hiyo, hiyo ninnaaphenta ni awo vekekhai ti munn’ihu mulopwana ni muthiyana. Ninnixukhuru okhalana mwaamukhaani ola oyariwa vatthokoni vaya, yeeyo tthiri eruuhale murukunuxo mw’emusini. Ni ethhune, tiithi ni amaama omuruuha mwanamwan’ola vano wira ovahereriwe. Vano, Yoolempwa enihimyá wira, “Awo yaanaaruuhá anamwane

wa Yoowo, axikhaani, wira Owo owiixaatherye matata Awe ni aareerihe.”

¹⁵ Vano, aakhala atthu molumwenkuni anaamini ele aniihanaaya “opatiiso w’anamwane.” Nto, eyo ti wii, awo anaakuxa axinamwane ala ni khanaapatisa nnakhala, okhala wira, awo anaamiserya maasi paahi. Vano, hiyo khanimphwanya eyo hata nipuro mBibilian, vaavo otonko aya omiseriwa mutthu, aalweene, hata anamwane.

¹⁶ Nto siiso opatiiso ohimya wira muteko wa mahala wa muhina woovariwa. Ni anamwane axikhaani khansuwela etampi. Tivo, okathi Yesu okhwiyaawe vamwiikimanyo, Owo okhwiye wira attipihe itampi sa molumwenkuni. Ni okathi mwaana onkhalaawe mutthu, ni oniyariwaawe molumwenkuni mu, awo kharina hata etampi ya yaawo, tivo awo kharina orukunxa murima wira wiiriwe. Masi, okathi eyo, Ephome ya Yesu Kristu enikumihaaya etampi iyo. Vekeekhai, mwaana oniyariwa mutampini, onipakiwa mwa sootakhala, onrwa mulaponi oothaka, ni awo anatampii v’ephattu, masi Ephome ya Yesu Kristu enmittipiha eyo. Masi okathi mwaana oniphiyeryaawe munnuwelo w’osuwela ethhu, ni onsuwelaawe eri yooreera ni yootakhala, vano ohaana orukunxa murima mwaha w’ethu iiralyaawe. Eyo etampii vano etampii siiso ntoko siniyariwaawe mutampini, eyo etampi ya mutthu, etampi vano etampi Atamu ni Hawa yiiranse aya; ni eyo yookumihiwa ni Muluku, ni Ephome ya Yesu Kristu. Vano mwaana khorina itampi wira arukunxe murima mpakha owo wira etampi, vano ohaana orukunxa murima. Munnona? Vano owo arukunxa murima, nto p’ukathi w’opatsiwa, vano nto owo ompatsiwa opwinihiwaka.

¹⁷ Mpakha okathi yoowo, hiyo nintthara miixuttiho sa mBibilian, wira, “Awo yaanaaruuhu anamwane wa Yesu, wira Owo owiixaatherye matata Awe ni aareerihe.” Tithi ula oophenteya ohiy’ula onimuruuhu mwaan’ola mwaamukhaani wa pastore ni miyo, wira ovahereriwe. Ni awo annoona wira emuhelaka mmatatani w’ale animuthoonyerya Kristu, animuhela mmatatani mwa Kristu. Vano, ni waamini, hiyo nimmuroihua mwaana wa Muluku, wira nixukhuru mwaha wo omuruuhu va, ni onvekela Muluku wira amureerihe, yeeyo eniihanaahu “waavehererya axikhaani.”

¹⁸ Vano, moosuwela moota kaarowaaka waakhapelela an’aka. Kookhalana mwanamwane mwaamuthiyana Moovuwani ohiy’ula, ni owo aahivahereriwa w’Apwiya, vaava waltaari. Kookhalana mwammiravo ni mwaaruusi akilaathanse ottuli iwe, ohiy’ula, ahipatsiwe nlelo. Mmosa, muloko n’emosa, miyo kaalavula ni yoowo yeeyo olelo, Saara, ya opatiiso. Ni Yosefe orina mithanu ni miili paahi, tivo owo khoreere oyeva wa yeeyo nlelo, mpakha... Owoaatthunne-ru, ni ohimya wira Muluku t’ohenle eyo vamurimani vawe, miyo kaamwiira nto. Masi, ntoko

axikhaani, miyo kinaavahererya w'Apwiya paahi, okhala wira owo mwiixuttiho wa Soolempwa wa yeeyo.

¹⁹ Munna Neville, murowe ni miyo vano mpakha mmirav'ola ooreera. Miyo kaamoova wira . . . Ti Hollin? Hollin? Ayo, Hollin, Junior. Stephen Hollin. Ahe, ti yooreera. Oh, koona wira aamurupa. Eyo ti ephattu ya aHickerson, ethu yiiraneyaka. Miyo kaaahimoona nihiku nlo, miyo khwira "Mukhulupale," ni sikina. Ni, vekeekhai, eyo yaari ekhaanixa wa yoowo, moone, olavula sa yoowo ntoko "Mukhulupale." Ehaali anyu? Ahe, koosuwela wira ola muhakhu wa khula maama ooreera murima. Khimwaarowa wuupuwela siiso? Ooreera saana. Nto vano, Munna Hickerson mulopwana ni Munna Hickerson muthiyana, ntoko murumeyi a Kristu, ntoko pastore anyu, kinimukuxa ttutthu ula, ni waamini, omuroiha mmoononi mwa Yesu Kristu, mwa Yoowo nyuwo munthunanyu omuhela mmiyoononi mw'Awe.

²⁰ Nrowe nuurame muru okathi pastore ni miyo ninkhalaahu va ni matat'ahu vasulu va mwaana.

²¹ Tithihu a Wirimu, mBibiliani awo yaanaaruuhu wa Nyuwo axinamwane, wira Nyuwo nwiixaatherye matata ni wira mwaareerihe. Nto vekeekhai, Pwiya, awo yaanireerihwa. Nto vano wira nitthare ethoonyeryo Anyu, itthu Nyuwo siiralyanyu, hiyo ninniphavela oratta-enexa, Pwiya, nimusomaka Bibilia ni nittharaka ethoonyeryo oratta-ene ntoko Nyuwo siiralyanyu. Ni tiithi ula ni maama, Munna mulopwana ni Munna muthiyana Hickerson, awiixutti ahu oophenteya va mutapernakulu, anniniruuhela mpantte ola mukhaani wo otthapa Nyuwo mwaannyalyaanyu wira ekhapelele. Onikhuma wa Nyuwo, Pwiya. Nyuwo muhaavaha mwaan'ola. Nto vano awo antthuna evahererye ekumi awe yaamukhaani wa Nyuwo, wira ekhale yo woorumelani Nyuwo. Miyo kinvekela wira Nyuwo mmureerihe mwaan'ola, wira Nyuwo munvahé ekumi yoolekela. Okhale, vaweryaneya vale, wira oone Orwa w'Apwiya. Kinvekela wira Nyuwo mmureerihe khula nipuro oryaawe. Oleliwe yathokoni va oKristu, tthiri oyariwe mwa emosa. Ni otthikele ethhoko yeela. Atithi awe n'ame awe ekhale mpakha emoone mwaana vapulpitu, vaweryaneya vale, alaleyaka Ehapari yooreera. Awo anamputi omoona siiso, Tithi, ohikhanle ve—veehiceni ya Empa Yootteela, wala nipuro pi nipuro nikina, okhala wira awo arumeyi Anyu, ni antthuna wira ekumi ya mwaana ekhale yoovahereriwa ni eparakha wa muteko wa Muluku.

²² Vano miyo kinvekela, Tithi, wira Nyuwo mmureerihe mwaan'ola. Ni wira mahala a Muluku emurweele, ni akhalene ekumi ni oohakalala ekumi awe yothene. Ni wira atiithi ni ame awe akhale wira amoone wunnuwa, ninnivekela-tho. Mmureerihe hiyo ommureerihaahu mwa Nsina Nanyu.

²³ Nto vano, Stephen Hollin Hickerson mwaamukhaani,

kinnoovahereryani wa Yesu Kristu, wira iparakha hiyo nivekenlyahu soorweeleni. Mukhale mukumi ni a ikuru, mwamunn'aka, ni wira mukhale wira munvuwihe Muluku. Mwa Nsina na Yesu Kristu hiyo ninnivekela. Amen.

Muluku ooreeriheni. Muluku ooreeriheni nyuwo othene. Mwaana ooreera saana.

Weiwo ohinrowaahu wuuluvala, nnakhala
wuuluvala,
Muttetthe ohinrowaahu okhalakhala
nuuluvalaka;
Nnakhala wuuluvala, nnakhala wuuluvala,
Muttetthe ohinrowaahu okhalakhala
nuuluvalaka.

²⁴ Khenrowa okhala yooreeraxa? Amiravo anrowa okhala atokweene, ni atokweene okhala amiravo. Vano, eyo kahi yooreeraxa? Ni hiyo khaninrowa okhalakhala niwerekawa, wala nnakhala oxanka, wala nnakhala okhwa.

²⁵ Vano, miteko s'okkhorela, Munna Neville oohimya. Ni miyo kintthuna kihimye, vano, wira muthukuman'ovo, muhiliyale, ni mithukumano owo ohimmyaawe. Nave-tho, Muhamo Ford yoowo aarwaaka okereja miyaakha sivinre, kinoonamala-ru omuroiha wa mwan'awe muthiyana, mahiku vakhani avinre, vano owo orina miyaakha miloko mithanu na miraru, ni oorowa okumana n'Apwiya nsana ohiyu ewoora yaneethanu na tthaaru, woona waka. Ni miteko s'onvitha, pastore ni miyo ninrowa ovara okapela ya miteko s'ovitha Coots Namararu, ewoora yanamuloko—ewoora ya namuloko ni minuutu miloko miraru, Namararu ila enrwa. Muhamo Ford, Muhamo... Kinoona wira kooliyala exenei yawawe... Levi, Muhamo Levi Ford. Awihu... Owo ti—ovo ti mai a Lloyd Ford munimoonaanyu muliivuruni mwaka, wira aarowa okisukerya yoowara ele ya Xikuteero, niohanle mwetto mmosa paahi. Vano, owo ti—ovo ti mai awe mmirav'ovo. Tivo miyo kaahimukuxa nihiku nlo khuvekela ni yoowo, mutokweene owo oo haawaseya. Vano owo oorowa okumana n'Apwiya Yesu.

²⁶ Vano, Apwiya yaththuna vale, kaahikhala etthu va wira kihimye wira miteko s'okkhorela, sakhala sa esumana enrwa, kaahenle-ene va, wala mano kuupuwenle wira kaahihela, ya etthu kaarowaaka olavula mwaha wa o—o—orwa, muteko onoorwa wa esumana enrwa. Vakhala wira miyo—miyo kinoona wira... Koonaa wira kaahihela muliivuruni mu, nkisuwenle sinto kaahihela wala nnari. Ayo, ela eri va. Apwiya yaththuna vale, Saapatu ohiyu kintthuna kilaleerye mwaha wa *Xeeni Mutthu Ovaraka murima Makhalelo A Mukina*. Nto Ttiminku voosiis kintthuna kilaleerye *Omaligheriwa Wa Epiraamite*. Nto Ttiminku ohiyu kintthuna kilaleerye mwaha wa *Muhooleli Aka*, mwaha, *Muhooleli Aka*, wa Ettiminku ila enrwa ohiyu. Vano Apwiya

ereerihe itthu iyo ni ekikhaliherye, okhala wira nkaakhanle, ni yoohimya ekhaani paahi wira kilavule.

²⁷ Vano ohiy'ula, ninthuna naakuve noone itthu kamosakamosa. P'uhimya wene, kookhalana ewarakha va ena-enammalaru orwa okureyu, Billy okunxaawe okathi vakhani ovinre, wira axinna kamosa-kamosa ari oMichigan, nto ela enikhuma wa asosiyasawu ministeriyaale wira simnikhala itthu sinci-ene. Ti yeeyo enikhaliha itthu sootikiniha, moone. Wira, awo anihimya va wira axinna kamosa-kamosa wu yaahimya wira miyo kirimwaaruma iwe, vano awo analaley alopwana yaahaana waahiya axaar'aya n'umphavela muxirikha aya a muroohoni, ni wira-wira miyo ka oohivonya voomalela. Wira khiyaavo etthu... Ni, oh, itthu imosa-imosa soowoopiha sitonko wiiwiwa. Nto asosiyasawu ministeriyale khusuwela eyo, nto awo ankilepela ewarakha mwaha wa yeeyo, ni wira miyo kirimwaaruma wu ni eniruuha manyakanyaku, manci-ene. Nto akina aya alaleeryaka ni ahimyaka wira mulopwana aahaana omuhiya mwaara *ola* arove amuthele *ole*. Vano, ekerej'ela ennisuwela wira hiyo khinneemererya ethiru siiso.

²⁸ Hiyo ninnimwaamini Bibilia. Hiyo ninaamini wira mulopwana amukuxa muthiyana, owo ti mwaar'awe, nto okhwa paahi t'onwerya waavalaaaniha. Yeeyo paahi. Hiyo khinnaamini itthu siiso. Hiyo khinnaamini ophenta wootaphuwa, nave. Hiyo khinnaamini itthu iyo. Hiyo vekeekhai nimmwaamini Bibilia, nto Yoowo paahi. Tivo kinrowa olepa-tho, okopa ewarakha ela, ni kihimye yowaakhula aka kilaleerye murevistani, nto eyo—eyo enoolakiherye. Kinroromela wira enoolakiherye, khula enamuna, owaakhula awo.

²⁹ Vano ohiy'ula, nihinatthi okhunla Yoolempwa, nrowe nilavule n'Apwiya ahu.

³⁰ Tith'ihu a Wirimu, ninaattamel Veehiceni Vanyu va omoriwa ikharari, mwa Nsina na Pwiya Yesu, Ole muulupale aakhurunwe Movuwani wira anisuwelihye eyaattelo sa mihakhu sa Muluku. Moota onooxukhuru-ahuni Nyuwo mwaha wa Yesu ula muulupale Yoowo aari wiisooniherye wa Muluku, oowiikhaliha omutthu wa hiyo, ni mwa Yoowo nookhalana woopoliwa mwa itampi sahu. Nto hiyo vano noovira mookhwaani khuphwanya Ekumi, okhala wira ninnimwaamini Yoowo. Maana yoolempwa sa Yoowo, wira Owo oohimya, "Ole oniwa Masu Aka ni onimwaamini Ole okirumme, ookhalana Ekumi ehimimala; ni khanrowa olamuliwa, masi oovira mookhwaani khuphwanya Ekumi."

³¹ Mureerihe Masu Anyu, ohiy'ula, Pwiya. Ni hiyo nri va wira naakhele ekomunyawu mwa okathi vakhani. aKristu, anammuttetheni a Omwene anoothukumana waltaari, nto vaavo awo anrowa waakhela ele eniihanaahu "ekomunyawu," e—epante yaamukhaani ya—ya esakramaneto Nyuwo

munihiyenryaanyu, wira nooniherye wira ninnaamini wira Nyuwo mookhwela itampi sahu, khuhihimuwa mmurotonni mwaya, ni mwa mukumi voohimala-tho, ni niiraka yeela mpakha Nyuwo otthika, voolikana ni Soolempwa ntoko sinirummwaahu. Mureerihe mirima sahu mwa miyuupuwelo sootakhala ni sothene siiralyaahu saari soovirikana ni otthuna Wanyu wuulupale. Tithi, munilevelele, ni munivahé mahala Anyu ohiy'ula. Munikawele vano Yolya y'Ekumi, mwa Masu, okathi onsomaahu ni olavula Yaawo. Mwa Nsina na Pwiya Yesu, hiyo ninnivekela. Amen.

³² Vano Muliivuruni mwa Wiisuupulula, opacerya eversiikulu emosa paahi, kintthuna kisome eversiikulu 20, ahiiso versiikulu 1 ya kapiitulu 20.

*Vano kaahoona nlaikha naakhuruwa wirimu, naarino
ehulelo ya nlitti noowiixa n'ekwirinti yuulupale
mmatataní mwaya.*

³³ Vano miyo kaatthuna kilavule, vaakhanle, vaakhanle wira kaarowa wiihana yoosoma mwa yeela, wala okumiha enihimyaya mwa yoosoma ela, mwa minuutu miloko miili wala miloko miili ni mithanu sinttharelana, kaatthuna kiihane, *Ehulelo Ya Mukhora*. Vano, miyo nkintthuna wi—wiihana “ihulelo,” okhala wira Petru ohaakhela “ihulelo sa Momweneni.” Masi kintthuna kiihane ela: *Ehulelo Ya Mukhora*. Vano nto naanaanoru nuumala yeela, kintthuna kihimye moolumo vakhani mwaha wa ekomunyawu, nihinatthi waakhela ohiy'ula.

³⁴ Vano, ehulelo. Miyo kinniweha va okathi onsomaahu, wira Nlaikha nla naakhurunwe okhuma Wirimu, nirina ehulelo mmatataní mwaya. Kookupali wira ti Wiisuupulula 13 wala 19, ninniphwanya-tho, Nlaikha nikina nirwaaka ni ehulelo. Nto ehulelo ti, yootthuneya ya ehulelo, eri wira ehuleke etthu, etthu ewaliwe, wala etthu yaari wira ewaliwe. Masi ehulelo envaheriwa niwoko nenlo.

³⁵ Vano, sookhala mithinto sinci-ene sa ihulelo, okhala wira nihaana irumeelalo sinci-ene sa ihulelo. Sookhala ihulelo sa mapuro oosuka-mo. Yookhala ehulelo ya empa anyu yeenyu, yookhala ehulelo ya ekaaro. Ni hiyo niniithana ihulelo, nave iyo ihuleloo. Ni sinooweryaneya opakiwa vanli, imaara sinci-ene. Wala ya empa, sookhala imaara sikina sikhanylayaaya opakiwaka, ele eniihanaahu, ehulelo ekhulupale. Mwa moolumo makina, eyo ehulelo empakiwa ni ivenxero, sinvara muteko mwa yeeyo, e-enrukunxa ewalelo mwa enamuna emosa ni enniwerya ohalela ohula khula mukhora, eniitthaniwa “ehulelo ekhulupale.” Epakeliwo ya mukhalelo wa ihulelo sinci-ene, ni enooweryaneya ohuliwa siiso, ni mampa ahu wala hata ikaaro sahu, vanniweryaneya opakiwa ya napiili. Ni nto yookhala . . .

³⁶ Khiyaavo ehulelo enwerya ohula hata mukhora mpakha erumeeliwe ni ntata. Ehaana okhalana etthu wira erumeele

ehulelo. Ehulelo meekhaaya khenwerya wiirumeela. Ehaana okhalana etthu wira erumeele ehulelo.

³⁷ Eri ntoko mikorofooni ula ki—kinlavulaaka-mo. Mikorofooni ula khonlavula. Voohikhala wira yookhala etthu enlavula mwa yoowo, khonwerya olavula mmansaya. Ohaana okhalana etthu wira elavule mwa yoowo. Vano, kahiyo mikorofooni, nlo ti nsu wala o—onyakula (ottuli) mikorofooni onsuwelihaya ni—niwipi n'osulu, okela munaaruni mwanyu.

³⁸ Vano, ti siiso ery'aya mwa olaleya Ehapari yooreera. Khanihiyo hiyo mmansihu, ntoko arumeyi, hiyo khanihiyo Ehapari yooreera. Masi hiyo n'anamasuweliha paahi ninlaleerya Nsu na Muluku mwa okhala wahu eriyari, wa mutthu, wa ole oniiwa.

³⁹ Yoowoona ti enamuna emosaru. Miyo nkinsuwela etthu yoohimyeerya ekereja okathi ula vanihimya yoowoona. Masi Erooho Yoowaarya yaakooniharu, toko, yoowoona, vano kinoomusuweiha yoowoona eyo ole oniroiheliwa. Tivo khayaari yawaka, miyo, yoowoona nkaari miyo, miyo. Aari Muluku aavanhe yoowoona, nto miyo kaavanre muteko ntoko namasuweiha, wira kaaruuhele mutthaka wa yoowoona atthu.

⁴⁰ Vano, ehulelo etthu emosaru. Kileveleliwe. Ehulelo ehaana ovareleliwa paahi ni ntata ninhula mukhora. Moone, nihaana okhala ntata. Vano, nto ehulelo enrowaaka olavula ohiy'ula, niri ntata nimosa paahi ninwerya ovarelela ehulelo ela, nto nlo ti ntata na waamini. Eyo t'itthu emosa paahi enwerya—enwerya ovarelela ehulelo ela. Ni matata annivarelela ihulelo ikina, ni nintthuneya ntata na waamini wa yeeyo.

⁴¹ Vano, hiyo ninkuxa ntoko ehulelo ya osuwela. Vano, mutthu ohaana, vakhala wira omphavela othukumanya osuwela, moone, vano, yookhala ehulelo wa yeeyo. Yookhala enamuna mutthu ola orinaawe ohulaka. Owo ohaana okhala...wira ophwanye iliivuru sawe ni wiixutta wawe, ni owo khokhanle...khaavo okhanle wiixuttaka nipuro nawe. Pooti wiixuttihiwa, masi owo ohaana wiixutta. Nto enamuna emosa paahi ekhanlyaya wiiriwaka, owo ohaana ophwanya ehulelo eyo, wira etthu vale enuupulula wala en-...enoomuupululela osuwela owo omphavelaawe.

⁴² Ni aakhala atthu amphavela orumiha epiyaano, ni awo... wala muusika. Awo khansuwela saana moota wo wira eyo, masi yaamuwerya orowa wu nto muxuttiha ovaha nisomi nnisomi, nave awo khayaakkhalakhala yiixuttaka. Awo khanwerya paahi ovarelela ehulelo eyo ya esiiri iyo, moota erumelo ni sinruma sa ekokhelo ni siiso oruma namalwe. Entthuneya ehulelo.

⁴³ Ni matemaatika, yookhala ehulelo ya matemaatika, murinaanyu okhalana wira ovaraka enamuna aya. Koowoona atthu yaawerya okuxa ithataanelo xexe sa mammeru, ni ohela ikatha saya, khula emosa wa ikatha saya mw'ethataanelo

emosa ya mammoru, ni yaamukhuruwela *saale* khino mammoru mathanu wala mathanu na mosa voowiixa, ni ohela yoowaakhula aya vathi. Yaalikelaka ithataanelo xexe khula okathi, khula nipuro okhuma emosa mpakha thanu na xexe. Ahe, vannikirikela waalikela ethataanelo emosa, voohikhala wira kirina ikatha soophiyerya mmatatani ni munawoni wira kaalikele, wira—wira kaalikele ethataanelo emosa. Nkinaweryeke ophwanya ehulelo eyo. Masi, moone, akina aakhalana ehulelo ya yeeyo, awo annisuvela moota wo wira.

⁴⁴ Ni yookhala ehulelo ya osuwela, mutthu onaavya osuwela. Yookhala ehulelo ya siyensiya, othokosa wa siyensiya. Vano, yookhala, eyo ehulelo yuulupale. Atthu anniphavela ehulelo eyo.

⁴⁵ Ntoko nno okathi vakhani ovinre awo yaahimphwanya aatomu, ni yaahisuwela wira yaahikhala aatomu, ni wira aatomu yaapaka imoleekula ni siiso. Vano, awo khupacerya othokosa, ookhala aamini wira vakhala wira attomu owo aakhaliha sothene vamosa, aatomu owo aarukunxiwe, yaamukumiha ele yaamuvarelela ni yaamumpwexakasa. Okhala wira, itthu sothene sinlipihiwa ni aatomu, hiyo noosuwela eyo. Vano, nipotto nle ninlipihiwa ni aatomu. Nyuwo munkhala mpurukuma mwaha wa aatomu. Malaxi, miri, itthu sothene sinkhalihwi vamosa ni aatomu. Ahe, aatomu owo, orukunxelaka sothene epantte emosa, vaaweryaneya opwexakasiwa ni orukunxiwa, nto aamuuhonona. Ni, vano, anasiyensiya aalupale yaamini wira eyo yaamuweryaneya wiiriwa, ni yaahivara muteko khuvara muteko, nto khukhala ewoora ti ewoora, ni esumana t'isumana, mwaakha ti mwaakha, mpakha vookiserya awo khuxintta.

⁴⁶ Aari, kookupali, Thomas Edison, mwaha wa muthuko, enihimmwa wira mulopwan'owo aahikhala osuwela wira owerye opaka muthuko ni eletrisitaate. Owo ti nampaka luuxu. Ni hata khaarowa orupa ohiyu. Owo aakuxa mukatthe mmatatani n'ukhuura ntoko yoolya awe, n'ukilaathi vale n'utthokelela n'uvara muteko. Nipuro nlo muhina saana mmuupuweloni mwawe, etthu yaanimuleela wira aamuwerya wira. Exeeni iyo? Ti ehulelo enwerya otthukula ephiro.

⁴⁷ Miyaakha woohikhala khalayi, aahikhala mu—mulopwana mmosa aamini wira aahikhala erattelo wira olepeke ihantis mwa etthu ya malootho maxexe. Owo aanaamini wira aahikhala ehulelo mmatatani mw'awe. Vano owo aathuna... owo khurowa... Owo aakhala oKansas. Owo khurowa wa namathitta exornaale yuulupale oKansas City, khukuxa soolepa sawe kamosa-kamosa. Nto namathitta khwira, "Mulopwana, khamurina. Nyuwo, khivantthuneya weehererya, nyuwo—nyuwo khamunwerya." Masi eyo kхиyaamusivenle. Owo aanisuvela wira aahikhala. Vano owo aahithika imaara sinci-ene, aphavelaka, masi owo (namathitta) aanimukhoottta. Vookiserya, owo khurowa mapuro makina, khukhoottiwa,

yiiraka, "Mwenye, khamurina tu. Khamunwerya wira." Masi nnakhala vo owo aanaamini wira aamuwerya wira. Nto ti siiso, owo ookhalana ethu mmatatani mwawe! Vookiserya, owo khuphwanya muteko wo olepa muttala mukhaani wa, kookupali, epaphelo ya ihapari wala ethu ya ekereja, muthinto mmosa wa sookhumela mmapaweni makhaani sa ekereja. Vano owo khurentteri nipuro nikhaani noopwehiwa ikaaro nookhalana anawili wala makhule, vaavo makhule yatthimakasaaya mapuro othene ni sothene, mpapheloni mwawe, nto owo khupacerya woona omeekha wa nikhule nimosa nikhaani. Ti vaavo epacenryaaya ehantisi ya Mickey Mouse. Vano Walt Disney namilyawu. Mwaha wa xeeni? Owo aahikhalana ethu mmatatani mwawe, ni aanisuwela wira aanivarela, owo aanisuwela wira aamuwerya wira. Ni ti siiso khula oxintta wuulupale omphanyiwaaya. Okathi alopwana n'athiyana ankhlanayaaya etthu mmatatani mwaya, ansuwelaaya wira anoowerya.

⁴⁸ Okathi esupiyaani yaamwarenlyaaya mulaponi. Okhala wira, othene vano ninrummwa omwaakhela mwaapomphe, wira emalamalihwi. Okathi esupiyaani emwareiayaaya... Nsana kaamwiwa meetiku mmosa okathi weettihaaka ekaaro muramphani, meetiku mmosa a oLouisville. Owo khwira, "Miyaakha vakhani sivinre, okathi ehasara yuulupale yaakhumelenlyaaya oLouisville," khwira, "vaakhanle wira atthu yaaheemela kaaryaaka-vo, ni khoona ikaruma s'omumulano miloko mithanu ni thanu na piili, ni alopwana, athiyana, amiravo n'aximwali, oorakalihwi ni eretta eniihaniwa 'esupiyaani,' ni khiyaakhanle ethu yaaweryaneya wiiriwa." Khwira, "Miyo nkintthuna-tho woona ethu siisaale."

⁴⁹ Masi siyensiya aahuupuwela, "Yaakhanle-ene ethu yootakhala ntoko esupiyaani, vekeekhai yookhala ethu wira ewane-no." Awo yaahiwana, yaahikhala mphironi ni ipoota, anamattipiha mooro ale, yaahirula ixapheyo, yaahiveka, yaahixonntela, yaahiira sothene, ephavelaka ophwanya ehulelo wira ehule mukhora wa otaphuwa. Nto, vookiserya, mulopwana mmosa muKristu aaitthaniwa Salk khumphwanya mwaapomphe. Mwaha wa xeeni? Yaahikhala ethu yootakhala vapuwani, aahikhala namwiiva vapuwani; yaahikhala ehulelo nipuro nlo yaawerya waahulela-tho otaphuwa atthu, nto mwaapomphe Salk waari oloola wuulupale. Oh, ethu ehulelo ekhanlyayaaya wiiraka! Mwaapomphe khupakiwa, nto vano enoomalamalihwi esupiyaani ni mwaapomphwe yoola, okhala wira waari mwaha wa "ohikhalakhala ekhulumuwaka ni ohikhalakhala ehiyaka," ehulelo ele yaari nipuro nlo. Yaahikhala ethu yaarowa waakiha evirikanyaka yeeyo, ni awo yaahitthunaxa ophwanya.

⁵⁰ Nto yakhala yootakhala emosa ntoko esupiyaani, owereya vammilo, ettuvu, ettekuxa ya ncano, teetanu, wuuma eyano, ni

sikina, siyensiya onweryaaawe, owanana, sootakhala iya, othana n'uhiyu, mpakha animphwannyaaya mwaapomphe a seiyo, okhala wira ti yootakhala, namwiiva, khivatempe okhala ehulelo ya woopowa wa mutthu ori mukalapooso mwa etampi? Yookhala ehulelo ya mukhor'owo, wira yaataphule atthu mwa yeeyo.

⁵¹ Ehulelo, voolimaleleya, yaarukunxaka ewalelo, ni, mwaphwanya vale ehulelo, ehaana okhala ya muhakhu khata, ethu eniphwanelela, ahiiso khimwaarowa hata owalela. Yaahiphwaneleleka owalela, muhiye paahi. Masi yaaphwanelelaka owalela! Vano ehulelo voolimaleleya e—ethoonyeryo ya ethu, wala enamuna y'okela mwa ethu emphwanelela. Ehulelo, ti yeeyo ekhalenly'aya, vano, eyo entthukula ethu eniphwanelela.

⁵² Vano noosoma mwa Yohani Oowaarya, kapiitulu 10, Yesu ohimmye wira, "Miyo ka Mukhora wa munikhomani. Miyo ka Mukhora," kahi mukhora *khata*, "ka Mukhora, Mukhora mmosa paahi. Miyo k'Ephiro, Ephiro emosa paahi, Ekeekhai, ni Ekumi, ni khaavo onrwa wa Atithi ohivinre wa Miyo. Miyo ka Mukhora wa munikhomani ni othene ale anoorwa Miyo kihinatthi awanani, anawiiye ni alavilavi." Owo ti Mukhora wa munikhomani. Owo ti Mukhora wa woopowa.

⁵³ "Khanivo nsina nikina nivaheriwe vathi v'Erimu mukhanly'anyu woopowaka, mwa Nsina na Yesu Kristu paahi." Hata ekereja, hata muromolelo, hata eyaaminelo, hata miixuttiho sa ethu p'itthu; mwa Nsina na Yesu paahi. Eyo ti—eyo ti Ehulelo. Khivanxankiha Petru vaaweryaaawe orumeela emosa aya Nihiku na Pentekosite! Awo yaatthuna osuwela moota w'ovolowa Mukhor'ole. Owo aarumeenle Ehulelo. Ni eri Ehulelo emosa paahi, okhala wira ori Mukhora mmosa paahi. "Miyo ka Mukhora." Vano Petru aahikhala Ehulelo wa Yoowo. Nto owo khwira, "Murukunuxe murima, khula mmosa a nyuwo, mpatisiwe mwa Nsina na Yesu Kristu wira muleveleliwe itampi sanyu, nto munimwaakhela mihakhu sa Muluku." Ti Ehulelo ya Mukhora, ni Yesu ti Mukhora.

Ori Mukhora mmosa paahi wo ovoniha, ni Yesu ti Mukhora yoowo.

⁵⁴ Ori Mukhora mmosa paahi wa murettele. Ayo. "Murettele aka kinnoovahani." Owo Mukhora mmosa paahi wa murettele wooloka. Khino munuupuwela wira mookhalana murettele. Nyuwo pooti othukumanya musurukhu woophiyerya othuma empa anyu, pooti othukumanya musurukhu woophiyerya wira mwaathumele ikuwo an'inju, okhalana yoolya wira mulye, masi nyuwo pooti othukumanya osuweliwa woophiyerya wira mukhale oosuweliwa eriyari y'atthu. Masi mwaarulaka ixapattho sanyu ohiyu munailikanyiha wira mummaathi, eri Etthu Emosa paahi enwerya woovahani murettele. Eyo ti wii, mwaasuwenle wira mwaamookhwa ohiyu yoowo, ori Murettele

mmosa paahi, nto, eyo ti, Yesu ti Murettele. Owo ti Murettele ahu.

⁵⁵ Owo ti Ovonihiwa wahu. “Miyo k’Apwiya Muluku anyu kinvoniha iretta sanyu sothene.”

⁵⁶ Owo ti Mukhora wa Wirimu. Ni khiwaavo hata mukhora mukina wala hata enamuna ekina woohikhala mwa Yesu Kristu. Owo ti Mukhora wa Wirimu.

⁵⁷ Nto vano Yesu ti Mukhora wa itthu iya sothene, nto waamini ti ehulelo enihula Mukhora. Vano, vakhala wira Yesu ti Mukhora wa anatiri ala othene a Muluku, waamini muteko Awe omalihewe onnihula khula mukhora wa khula muhakhu ori muhina mwa Omwene wa Muluku. Munniwa? Ehulelo ti... Waamini ti ehulelo emmutthukula khula natiri Owo onimuhimyaawe. Ehulelo ya waamini enniira yeeyo, waamini muteko Awe omalihewe. Ti ihulelo seiya hiyo ninlavulaahu.

⁵⁸ Vano mw’ahperi, kapiitulu 11, kookhalana elista yuulupale alempwe va, ya oowiivaha ala a waamini. Yaari ehulelo, ya—ya Mukhora, yaamaalinhe eyano ya amwatto. Yaari ehulelo, waamini, yaahunle ikhatteya. Waari waamini, ehulelo ya waamini, yaattipinhe owali wa mooro, waatthyanwe orere wa xoowa, waahihimuxale alipa-ookhwa. Waari waamini, ehulelo ya omwaamini Muluku mukumi. Ntata nle, mulopwan’ole, muthiyan’ole, onwerya okuxa ehulelo ele ya waamini, awo anoowerya omutthukula khula natiri Muluku omuhimmyaawe. Masi mwaahikhalane ehulelo eyo, nyuwo munimwaakanyerya paahi, khimunrowa ohula. Munookumulana ni yeeyo, okhala wira ehulelo ela...

⁵⁹ Khula ehulelo yoopakiwa oratteene yookhalana ivenxeryo muhina mwa ewalelo, ni entthuneya enamuna khata, ni epakeliwo khata ya ihulelo iyo wira erukunxeke ivenxeryo iyo. Nto evenxenryo emosa ekhaani yoosusa, enootepanya etthu yothene.

⁶⁰ Tivo, miyo kinnaamini Ehapari yooreera yoomalela, Masu othene a Muluku, ankumiherya owerya wa Muluku, anruuhela iparakha Sawe wa atthu. Ti ehulelo ya Mukhora, eyo enihula Yoowo. Oh, atthu awo oowiivaha aalupale, maprofeta ale ni atthu aalupale a mBibiliani, yaawo yaarina ehulelo eyo! Mwaha wa yeeyo awo yaawery’aya omaaliha iyano sa amwatto, ottipiha owali wa mooro, otthyawa orere wa xoowa, waahihimuxa alipa-ookhwa, ni opaka inamuna sothene sa miiriirya, okhala wira awo yaavarelela ehulelo eyo ni yaanisuwela wira yaanivara muteko, okhala wira yaari ehulelo yooyariwa ni Soolempwa.

⁶¹ Vano, kaailevaka ni ehulelo ya eyaaminelo, nkinsuwela etthu enrowaaya wira. Awo yahimya wira “ekerej’aka eniixuttiha *ela*,” miyo nkinsuwela ya yeeyo.

⁶² Masi Bibilia aaixuttihaka, nto miyo kinakhalana ehulelo ya waamini mmatatani mwaka, wala mmurimani mwaka, enihimya

wira “awo Masu a Muluku,” eyo enoottipiha owali wa mooro, enimwaatthukulela ovonihiwa aretta, enimwaatthukulela woopowa ale oorimeela. Kihaana orwa mpakha Yamukhora, sothene ti mwa Nsina Nawe. “Sothene muniiraanyu ni moolumo hata ni miteko, mwiireke sothene mwa Nsina Nawe.” Musuwelaka wira ehulelo erinaanyu waaminii, okhala wira eyo ehulelo yoopakiwa ni Soolempwa. Vano, yakhala ehulelo ya eyaaminelo, ehulelo ya muromolelo, nkisuwenle ethu enrowaaya wira. Masi yakhala ehulelo ya Soolempwa, enoohula, okhala wira Muluku ohimmye siiso. Vano, oh, khivanxankiha awo yaaweryaaya omaalihha owali wa mooro, ni siiso, awo yaarinasa ehulelo.

⁶³ Ettikinyero muru yoopacerya ya Muluku wa mmosa a maprofeta ale, kхиivo yaawerya oweemexa. Owo khaarina wira ntoko sinikiirelaawe miyo imaara kamosa-kamosa, okhanyereryaka imaara sinci-ene, ni khino nyuwo (kinroromela wira nnari), masi onikhala akileelaka, “Murowe mwiire ela,” vano nto munoorowa nveveleyaka, “Vano murowe mwiire ela,” ni “Mutthike mwiire-tho, khamwiirale oratta-ene.” Ettikinyero muru emosa ekhaani paahi! Paahi, awo yaaniwerya woona Erooho waahimeerya, “Eyo ti etthu yo wira,” ni kхиyaavo yaarowa oweemexa. Munna, awo—awo—awo yaahimaaliha iyano sa amwatto, yaahittthyawasa orere wa xoowa, yaahittipiha mooro, awo yaahiiira sothene. Ettikinyero muru ekhaani paahi ya Muluku, okhala wira awo yaanikhalana ehulelo mmatatani mwaya, waamini iwe wuulupale! Awo yaahimwirela itthu Muluku okhala wira kхиyaavo yaaweeemexa. Oh, moota eryaaya yoovuwa!

⁶⁴ Ntoko mwammiravo emaara emosa aarwiye wa munna mmosa mutokweene aari mulopwana ooreera murima a khalayi, profeta a khalayi a Muluku. Vano owo aanimwiiwaka mulopwan’ole ohimya onamoona voohihiyererya, voohihiyererya ahimyaka oreera murima wa Muluku, ni moota Muluku aary’awe, ni ele Kristu aaryaawe, ni aaniththikela paahi, alavulaka. Vookiserya, mmirav’ola aarowa okhalihwiwa mulaleyi, vano owo khurwa wa musuweli ula mutokweene, nto owo khumwiirela, “Mwenye, kintthuna kookoheni ethu.”

Owo khwira, “Kohakani, mmiravo.”

⁶⁵ Owo khwira, “Kristu vekekhai onnihimya etthu wa nyuwo vanci-ene ntoko sinihimyaanyu wira onnihimya?”

⁶⁶ Owo khwira, “Owo onnihimyaxa etthu wa miyo ovikana kaarowaaka owerya okhalana iphumu wira kilavule!” Eyo eri vo. Yaari exeeni iyo? Owo aahiphwanya ehulelo.

⁶⁷ Mmirav’ole khuhimya, ya yeeyo, “Nyuwo mwaahimyaka itthu iya, ni munakileela wira iyo ti s’ekekhaixa ntoko nyuwo, weeso kintthuna kimusuwele Yesu yoowo mmosaru, mwa ekekhai emosaru.” Yaari exeeni iyo? Owo aahisuwela wira

mutokweene ole aahikhala na ehulelo, owo aaweryaawe ohula ni owala.

⁶⁸ Moosuwela, ehulelo enwala, ennihula, nave. Munnona? Vanniweryaneya otaphula ni otthuka. Ti yeeyo. Ehulelo emosaru yeeyo enwala, ennihula. Ehulelo enihula, enniwerya owala. Ni ti siiso, moone, okhala wira ennivara muteko ipantte soopiili. Wooniha othunku okhala wira ekereja eroopweteiwa yoowoona aya ya yeeyo! Etthu xeeni yooxankiha yaary'aya okathi ekereja yiitumihalyaaya mwa iyaminelo, ntoko siiralyaahu olelo, nto vano enimwiihana wira yiiraane.

⁶⁹ Nohoona vatthu etthokiheryo yuulupale ya oruma w'oRoma ni akina anrowaaya okumana vano, anrowa orukunxa iprokrroma kamosa-kamosa. Miyo koona wira awo khiyarukunuwa; masi awo anoorowa orukunxa, khula enamuna, onvaha khula namukuttho owerya wa paapa, ni—ni khula nipo royaawe, ni sikina. Wooniha othunku, ekereja yiitumihalyaaya mwa makano ohiya Masu. Munnona? Ti vaavo awo ahiyalyaaya ehulelo, vaavo vo. Mwaha wa yeeyo miiriiryu suulupale ni ithoonyeryo sihinipakiwaaya eriyari y'atthu olelo, saakhalaka khalayi, awo ehaarimeela ehulelo! Ayo, awo annisuvela Mukhora, awo annisuvela wira Mukhora ori vale, masi etthu enttharelana ti ehulelo wira ehule Mukhora. Mihakhu siri wiithela wa Mukhora. Siroowaleliwa, voohooneya wa mulipa-oohaamini. Masi mulipa-oowaamini, orina waamini ni onwerya okuxa ehulelo ya waamini, onniwerya ohula Mikhora iya. Ayo, mulopwana.

⁷⁰ Emaara emosa nno iyaakha vakhani sivinre, aahikhala munna mmosa misiyonaariyu, nto owo aahoona wira aahikhala wihaniwa orowa wAfrika. Owo aari mmiravo; mwaara mmosa ni anamwane anli, ooreera saana, axithiyana, oophiyaka iyaakha thanu na piili wala thanu na tthaaru, khula mmosa. Nto mmirav'ola khaawerya ohiya wuupuwela eyo. Owo aari mu—murumeyi, owo aahikhala ekereja yooreera mulaponi. Masi khaawerya otthyawa wihaniwa iwo, owo “ahaana orowa wAfrika.” Vano owo aahivekela, othana n'uhiyu. Owo khaathuna orowa. Vano Muluku aanitthikela alavulaka ni yoowo, “Nyubo muhaana orowa!” Nto vookiserya owo khuphiyerya okathi, wo othanla, vaavo, owo—owo aarinaawe orowa!

⁷¹ Vano owo khurowa wa makhulupale a misawu a okereja wawe, nto khwira, “Muluku ookihihanelo opuwani wa misawu mutakhwani wu wa—wa oRodesia.” Ni etakhwa ela ti yoosareya ettekuxa, ni ehooma, ni nsuwa nle nooviha, iretta ni maretta, ni inamuna sothene sa iretta mutakhwani mu, okhala weiwo owo aarowaawe opaka...oviriba ekumi awe yothene. Khutumiha empa awe ni sothene saarinaawe. Vano makhulupale a misawu yaathuna omweehererya, nto awo khwira, “Mookupali vano?”

Owo khwira, “Miyo kookupali.”

⁷² Awo khumwiirela, “Mwenye, mootthokelela wira, muhaana aana axithiyana aili ooreera, ni muhaana mwa—mwaara mwali oophenteya, nto paahi muno... Muhinrowela-ni woona moota ery’aya vano nto mutthika?”

⁷³ Owo khwira, “Nnari, Apwiya arookileela. Oh, ti y’ekekhaixa!” Owo khwira, “Apwiya aakiihana. Ni miyo—miyo nkintthuna ohiya empa aka, nkintthuna ohiya ekerej’aka ni atthu aka, masi Apwiya akiitthanenle weiwe mutakhwani mmwe.”

⁷⁴ Nto owo khwira, “Mulopwana, mwaanisuwela wira vanooweryaneya axiruusi anyu ophwanya eretta ya ettekuxa ya ncano wala ettekuxa ya maasi ooriipa, akhwe, ohiyu omosaru?” Ni owo khwaahimya atthu oohiyana-hiyana yaapweteiye aana aya, axikhaani, mwaha wo waarooha weiwe, mwaha wa iretta awo yahaamphwannyne aya mwaapomphe aya. Ni khwira, “Muupuwele maretta, amwaar’inyu ooreera ni axiruusi anli arina-ene maretta, ni nsuwa nle nooviha ni itthu murinaanyu ovilela.” Khwira, “Khamunoova, ni woopiha wo waarooha an’inyu ni mwaar’inyu nipuro siiso?”

⁷⁵ Nto misiyonaariyu khukhala vale, mmiravo, nto maithori khupacerya omora wiitho wawe, owo khurukunuwa, khwira, “Axinn’aka! Yoohoona aka ya wiitthana wa Muluku,” owo khwira, “vakhala wira Muluku okiitthanenle wAfrika, an’aka ni amusi aka anookhala oolipaxa wAfrika ovikana khula nipuro molumwenkuni.” Amen. Yaari eexeeni iyo? Owo aahikhalaana ehulelo yo wiitthaniwa wawe, owo aahikhalaana waamini wa ethhu aahimyaawe. Oh, miyo kuupuwela, nuulumo xeeni n’ominyala! Okathi wiiwaly’aka yeeyo emaara yoopacerya, murim’aka waahitupha. Moone, “Vakhala wira Muluku okiitthanenle wAfrika, an’aka mwa maretta ni eretta ni itthu sothene sikina, anookhala oolipaxa ovikana khula nipuro nikina elapo ya vathi.” Owo aahikhalaana ehulelo. Ti yeeyo entthuneya.

⁷⁶ Mwakhalanaru ehulelo, khokhanle woova, khokhanle ohoverya, khokhanle hata okoha. Khamurina omukohaka mutthu mukina mwaha wa yeeyo, nyuwo munnisuwela oratteene. Mookhalana mmatatani mwanyu, munnisuwela ethhu yo wira. Amen. Munnisuwela ele ekhanle yookhumela, munnisuwela wira mukhora onoorowa ohuleya. Mooweha saana ivenxeryo ni moosuwela wira ethhu yoolikanaxa, mukhora onoorowa ohuleya nyuwo mwahela-ru ehulelo mwa yoowo.

⁷⁷ Oh, vaakhanle wira ekereja yaahikhalaana ihulelo paahi! Vakanle wira ekereja yaahikhalaana ehulelo ya waamini paahi, naamuwerya ohula khula mukhora, khula eretta, khula ehasara, khula mwaha okhanle. Vaamuweryaneya ohuleliwa hiyo vaakhanle paahi wira naaniwerya okhalana ehulelo ela. Mulopwan’ola aahikhalaana ehulelo yo wiitthaniwa wawe.

⁷⁸ Mwakitthuniherya onaamona wawaka. Kinnuupuwela mwa iyaakha soophiyaka muloko ni thanu, muloko ni thanu na piili sivinre vano, ntoko, okathi Apwiya yaakihimenryaaaya ohitto iwe omuro, okathi Awo yaakhurunwaaya Munripui mmwe na Mooroo Nenlo munoonaanyu elatarato aya, vano Awo khulavula ni miyo khwira, “Nyubo munooroiha Mutthak’ola mulaponi mothene.”

Ni kinnuupuwela oGreen’s Mill okathi Awo yaalavunlyaaya ni miyo.

⁷⁹ Vano miyo khurowa khimuhimeerya pastore, vano owo khukileela, khwira, “Billy, mulyiiye exeeni ohiyu ule? Mwaarina ettora.” Owo khwira, “Mutthikeli muteko anyu. Nyubo munvara muteko Mmutthenkesoni mwa Miteko sa Mmawaani, murina muteko wooreera, mutthike mwaxikhe i—itthu sanyu, mwan’aka.” Khwira, “Mwaarina ettora. Muhoolya etthu.” Eyo khiyaakoopopinhe hata vakhani!

⁸⁰ Vapacenryaaka miteko s’ovoniha, anci-ene a nyubo va munnuupuwela Mutthaka aka voosiis’ule, *Ntoko Davidi Saaronwaawe Okumana ni Koliyathi*, kaalalenryaaka.

⁸¹ Nto kileeliwa, owo khwira, “Nihiku na siyensiya a vano, okathi orinaahu inamuna sothene s’othokosa sa mameetiku, okathi orinaahu matothoro oosuvelexa, okathi ekereja elianlyaya ovoniha wa Muluku khalayi ni itthu sa, iyaakha sinci-enexa khalayi, munrowa woonana sayi ni ookerorosowa muulupale siiso? Munrowa okhuma sayi ohoole w’alMetotista, aPatista, maPrespiteriyaano, n’akina, nave hata aPentekosite, ale alianle eyo okathi ovinre khalayi, khukela mwa iyaaminelo say? Munrowa woonana sayi, muhirina muromolelo wala hat’ethu ekina wira yookhaliheryeni? Munrowa wira exeeni, Bill?” Mwa enamuna emosa, ekina, eyo khayaakoopopinhe hata vakhani, maana kaahikhala ehulelo mmatatani! Miyo khwira... Awo khwira, “Khaavo onrowa owaaminini. Khamunrowa owerya wira. Khaavo onrowa owaaminini.”

⁸² Miyo khwira, “Nkincala. Kookupali etthu emosa; Muluku orookiihana, ni kihana orowa okhala wira Muluku orookiihana.” Miyo koovarelela ehulelo. Owo aahikihana, Owo aahikooniherya, Owo aahikileela, ni kihonna Mukhalelo Awe okathi Owo okirumaly’awe, ni ehulelo yaari vaavale!

⁸³ Pastore khwira, “Ni osoma wa ekalaase ya neethanu na piili, ni munrowa olaleya ni ovekela ohoole wa mamwene ni mapewe!”

 Miyo khwira, “Eyo ti voolekana ni Masu Awe!”

⁸⁴ Okathi ntoko yoola mwaisana, wala esumana emosa wala piili khalayi, okathi waarwiyaaka okereja va khooleelani wira Apwiya Muluku yaaahikivaha yoowooda, yo orowa mukwaha wo oxaya, ni mwa—mwaamunama mmosa kaarowaaka omphwanya, aarowa okhalana manyaka a meeturu emosa ni isentiimeturu thanu na piili. Nto mphironi kitthikaka numala omuxaya

mwaamunama ola (nipuro naarowaawe okhala, mukhalelo waarowaawe okhala), mphironi kitthikaka kaarowa wiiva ekhaya yoottweelela. Nto miyo khurowa nipuro nimosa, ni kilavula ni mulopwan'ovo, nto owo khwira, "Nkimmusuwela mwaamuna orina mukhalelo yoowo. Ni vanaasiwa ekhaya yoottweelela nkinatoko woona emosa."

Miyo khwira, "Masi ehaana okhala nno nipuro nlo."

⁸⁵ Siiso owo khwira, "Hata khaninrowa okela nipuro na ikhaya. Ninrowela ipwittipwithi, osulu saana ommalela etakhwa." Ahe, miyo khurowa ni yoowo.

⁸⁶ Nto nihiku naneeili wu, nipuro nene nenlo, vaavo vene Apwiya yaahimmyaaya, aaphwanyaneya mwaamunama. Tivo varonwaaka khimukuxa mwamunama, ni okathi waakumihaahu esapala, ni manyaka ni sikina, owo khwira, "Kintthuna kookoheni ethhu. Mukileenle wira, mahiku mararu ottuli okathi okhumme ahu o—omaxaaxani, wira vamanlyaanyu omoopela mwaaxinama khata, wira mphironi mutthikaka 'mwaarowa wiiva ekhaya yoottweelala.'"

Miyo khwira, "Eyo ti SIISO ANIHIMYA T'APWIYA!"

⁸⁷ Khwira, "Miyo nkinihoverya," owo khwira, "okhala wira munn'aka aahikhala ecile, ni nyuwo mwiira muhinatoko omoona mookhalaru, okathi waary'anu wenne emaara emosa, nto myuwo khukileela wira mmiravo ole aamurowa ovonihiwa kaairale-ru ethhu khata. Ni owo khuvonihiwa." Owo khwira, "Vano, masi, Munna Branham, kintthuna kookoheni," owo khwira, "Kinniwerya woona vathi mwaako ole iwe weiwo enipacerya etakhwa, ikhavaloo iye sirtyaaya-wo. Ni khiyaavo ethhu iwe. Khaavo malaxi hata vakhani, khuwaavo hata mwala, khiyaavo ethhu." Mirawa sa karibu, sirina isentiiometuru soophiyaka thanu orakama waya, vasulu vanimalela etakhwa, mwa ekilomo emosa ni nuusu vasulu va nipuro vanimalela etakhwa. Khwira, "Ekhaya enrowa okhala vayi?"

⁸⁸ Miyo khwira, "Muluku ti Yehova-yire. Vakhala wira Owo ookileela wira enookhala ekhaya iwe, enookhala-wo emosa iwe."

⁸⁹ Nikhuruwelaka mwaako, khula meeturu soophiyaka imiya thanu na tthaaru, naattamaahu, owo aaira, "Munna Branham, woophiya okathi wa ekhaya eyo okhumela."

Miyo khwira, "Muhiivelavelihe, enookhala vaava."

⁹⁰ Nto okathi waaryaahu voohalaka imeeturu soophiyaka imiya thanu na nipuro ikhavaloo saary'aya, naahaana omumulatho ni manyaka oolemela n'ithu ottuli wahu. Vano owo khuwehaweha-tho, nto miyo khoona wiitho wawwe okathi aakiwehaawe, ntoko wira mmurimani mwawwe aamwiikoha. Moone, owo aaroromela wira yaamukhala vaavale, masi khaarina ehulelo.

⁹¹ Masi mwa enamuna emosa, ni mahala a Muluku, Owo khonavonyeke ni miyo. Okathi Owo aakihimenry'awe wira yaamukhala ekhaya yoottweelela vale, kaahikhalana ehulelo. Miyo nkaahovenrye hata vakhani, hata vakhani. Miyo khimurukunuwela, nto khwira, "Bud, enookhala weiwe." Nto varukununwaaka, vale yaari ekhaya [Nipuro vahiitthu mufiitani—Mol.] yeemenle osulu wahu, mwa imeeturu soophiyaka imiya thanu na tthaaru.

⁹² Owo khukuxa ipinookulu, owo khwira, "Billy, tthiri, eyo ekhaya yuulupale yoottweelela!"

⁹³ Moone, ehulelo, yoowooda, Masu a Apwiya, khiyaavo ethu enwerya orukunxa Yaawo wala weemexa Yaawo. Etthu ekereja entthunaaya oh iy'ula kahi osoma. Etthu ekereja entthunaaya oh iy'ula kuhiy'ula muromolelo. Etthu ekereja entthunaaya oh iy'ula ti ehulelo ya Soolempwa, Mukhora. Yeeyo, Kristu ti Mukhora, ni Owo ti Masu. Waamini Masu a Muluku mukumi onnihula khula mukhora.

Muluku, munivahe ehulelo. Munivahe ehulelo.

⁹⁴ Aheperi, kapiitulu 12, anihimya wira, "Vano hiyo-tho nrukureriwe nneeku nuulupale n'anamoona, nrowe niihiye itthu sothene sinnilemela, ni ohaamini onnirukurerya vookhwewayo." Enihimya "etampi," okhalaka wira, *etampi* "ohaaminii." Munnona? Eri etampi emosa paahi, ekhanle ohaamini.

⁹⁵ Ni *etampi* enihimya "ovonya eninelo." Ntoko moopelaka, mwavonya eninelo, vanreerela mmulokiherye kapwithi anyu, moone, okhala wira yookhala ehilonke. Moovonya eninelo ene. Moone, mutthike mweeherererye-tho. Munnona? Enihimya orukunuwa, moovonya eninelo ene. Mwaaththunaka okhala muKristu, vano munarowa wiitakanaha ni ekereja, moovonya eninelo ene. Mwaaththunaka okhala muKristu, khunamiseriwa mwa nsina "n'Atithi, Mwaana, Erooho Yoowaarya," moovonya eninelo ene. Vanreerela mutthike. Khamunrowa onina exeko. Munootthukulaxa, vekekhaixa. Eri Etthu emosa paahi enwerya wookhalihani muliinyani moolikana, eyo ti Yoolempwa, Bibilia, Masu. Maana, erimu n'ilapo ya vathi sinoovira, masi Masu a Muluku khanvira.

⁹⁶ Tivo, nvarele ehulelo, waamini Masu! Ni khula waamini vakhani munaamini anyu, ni muhihoveryaka hata vakhani, monoowerya ohula mikhora sothene siri eriyari ya nyuwo ni eparakha Muluku orinaawe wa nyuwo. Muluku anikhaliherye okhalana ihulelo, ti mavekelo aka. Nuuramihe muru vano wa nuulumo na mavekelo.

⁹⁷ Tith'ihu a Wirimu, hiyo ninnooxukhuruni Nyuwo oh iy'ula okhala wira Nyuwo moonivaha ehulelo wira enihulele woopowa. Miyo—miyo kinnooxukhuruni mwaha wa yeeyo, Pwiya, mwaha wa hiyo woopowa, ni mwaha wa ehulelo ninweryaahu orumeela

mpakha va. Masi, Muluku, munivahe waamini, wira khula nimosa wa Masu ala alepiwe Mulivuruni mw'Anyu ti ivenxeryo sikhaani, vano Ehulelo ela eniihaniwa Yesu... Mukhora ola, kinihimya, oniihaniwa Yesu; ni ehulelo, eniihaniwa waamini, enikwannya khula Masu, eyo ennithukula. Eyo ennisusiherya vathi evenxeryo ele yaamukhaani ni ninoowerya okela mparakhani mmo. Tithi a Wirimu, munivahe ihulelo, wira niwerye owaamini anatiri a Muluku, wira waamini wahu ohivonye, wira niwerye okhala owoovarelani muteko Nyuwo ni ale onkhalanaahu poromosa.

⁹⁸ Mulevelele etampi yothene y'ohaamini wahu, Pwiya, ni munikhaliherye wira nikhale Awinyu. Hiyo ninoorwa vano vameesa va ekomunyawu, ni miyo kinnivekela, Tithi a Wirimu, wira Nyuwo munilevelele soottheka sahu sothene, wira niwerye okela moohakalalani w'opatthana vameesa va Muluku. Hiyo ninvekela mwa Nsina na Yesu. Amen.

⁹⁹ Munn'aka mulopwana, muthiyana, mwakhalana ehulelo ya Momweneni, ehulelo ya Mukhora, ehulelo ya woopowa, Muluku ookhaliheryeni ohula mikhora ni omuhiya Yesu ovolowa. Mmuhiye Owo oovaheni itthu nyuwo muhi—muhinreeryaanyu otthunaxa.

¹⁰⁰ Vano, okathi vakhani paahi nihinatthi opacerya osoma sa ekomunyawu, kintthuna kihimye ethu okhala wira ti ya ekomunyawu. Ni naarwaaka waltaari nno, eri enamuna emosa paahi yo orwa, ekhanle, nakhalana-ru ehulelo ya waamini mmatatani mwahu, ennisuweliha wira itampi sahu sooleveleliwa. Vano hiyo naahikhalane ehulelo eyo wira nihuule Mukhor'ovo, wira itampi sahu sooleveleliwa, khanirina ehakhi ya vameesa v'Apwiya. Okhala wira, ole onikuura ni onwurya ahiphwanelaka, onikuura ni onwurya ehukhumu awe, ahithokoreryaka erutthu y'Apwiya. Vano, eyo ekeekhaii.

¹⁰¹ Kinoona wira othene hiyo noosuwela wira olelo nihiku na Ekomunyawu na Mulaponi. Nla ti nihiku ikereja sothene sinaakkhelaaya ekomunyawu. Ti Nihiku na Ekomunyawu na Mulaponi mulaponi mothene. Nto miyo kaahuupuwela wira yaamukhala yooreerela olavula nuulumo nimosa wala maili a ekomunyawu nihinatthi waakhela, okathi pastore, xontte, oniiraawe athokihaka Soolempwa soolikana wira nisome wa ma—mattharelo a vameesa v'Apwiya. Vano, ekomunyawu ila... Vano, nkinrowa opisa minuutu soophiyaka muloko.

¹⁰² Ekomunyawu ila nimpahvelaahu waakhela, ennikhalaka evaanyihanelo yuulupalex ya miixuttiho sothene mBibiliani. Eyo yaari yawaya... emosa wa ivaanyihanelo saya soopacerya mukereja yoopacerya. Ni olelo aPrustante, a ePiskopaale ni aMetotista, ni ikereja sinci-ene Prustante, aakupali vooteeliwa murima mwiixuttiho w'Ekatolika, Katolika y'oRooma, yaawenrye-ru oxinta ekhottiheryo yaamukhaani ya

ekomunyawu. Masi awo anookupali wira namukuttho otheleke ni akhale murumeyi, ekereja Katolika yaahiiraana ni yeeyo imaara sinci-ene mwa ikumanelo saya ni mithukumano. Awo anniiraana wa yeeyo. Ni awo animwiiraana mwa mavekelo oohiyana-hiyana, ni sikina, ekereja Prustante enimwiiraana wa yeeyo. Ni katikeesi ni sikina, altaari mwaamukhaani va ni vale, ni ekereja Katolika yoolikanana wira yeeyo. Masi vaphiyenryaaya ekomunyawu, awo amonre vaavo. Khula mutthu otonko omusoma wahala onnisuwela yeeyo. Masi, vekekhai, mwa enamuna aka yo wuupuwela, awo yaahaana vanci-ene ohiya, kihinatthi—owerya okupali, moone, okhala wira kahiyu Bibilia.

¹⁰³ Masi kintthuna ehimeeriwe eththu emosa ekereja Katolika. Nyuwo moosuwela wira ekereja Katolika, wopaceryani, yaari ekereja y'arummwa ya pentekosite? Vekekhai yaari yeeyo! Waari wopaceryani wa ekereja. Nto munnoona vatthu va—vatthu vaphiyenryaaya, awo aroothikela akumihaka Masu elhelaka-mo makano.

¹⁰⁴ Ni vaakhanle wira ekereja Pentekosite yaamukhala miyaakha emiya sikina, yaamukhala ottaiwenexa wa Bibilia ovikana ekereja Katolika siryaaya olelo, moota enrowaya olelo.

¹⁰⁵ Sitthuneiye iyaakha imiya sinci-ene, wira ekereja Katolika ekhume mwa Yaawo, iyaakha imiya tthaaru, okhuma ekereja yoopacerya mpakha wiithokiha wa ekereja Katolika y'oRoma, yeeyo awo apacenryaaya. Vano awo ahaavara murima, yaaruuhaka atthu aalupale oottittimihiwa ni itthu siiso, vano awo khukumiha *ela* khuhela-mo *ela*, ni khukumiha *ela* khuchenxa *ele*, khwaakumiha amuluku eethiru apakawu khuchenxa itthontto sa eKristu, ni siiso, nto ahiyereryaka Eyo mpakha ophiyerya ele arinaaya vano, ekereja Katolika y'oRoma.

¹⁰⁶ Ni ekereja Pentekosite Y'ovaanyiha okhuma i—iyaakha miloko mithanu eyo enkhalaakaaya, ni woonaka wira yoomora vale vapacenry'aya enrowa okhala mukhalelo wootepa ovikana ekereja Katolika, muhina mwa iyaakha emiya okhuma vano. Ti yeeyo. Nlo nuulumo nuulupale n'ohimya, masi nwehe paahi vatthu awo amoralayaaya. Naanaanoru khukela mmutthenkesoni, awo aroorowa ahiyereryaka *ela n'ile*, ni itthu sothene sikina. Nto awo anoorowa, moone, ethikaka.

¹⁰⁷ Masi, *ekomunyawu*, eniihaniwa “olya w'Apwiya.” Vano, atthu anci-ene, antthuna waakhela voosiisu. Khehimmye mBibiliani wira waari olya Wawe wa *voosiisu*. Ni moota atthu ala olelo, moota anweryaaaya nlelo wira “olya w'Apwiya,” nave awo khaniira. Awo aroothikila *olya*, khukumiha, nto khwiihana “yolya y'ohiyu,” ethiru. Olya!

¹⁰⁸ Vano, kweekwe evaanyihanelo okathi wa Bibilia, yaari evaanyihanelo okathi ule. Atthu khayiiwale oratteene olya w'Apwiya. Okathi yaarwaaya vameesa, Paulo aahaahimeerya

aKorinto ale, wira awo yaamurwa n'uhapaliwa vameesa v'Apwiya. Moone, eyo yaari oohiiwiwa saana okathi ene yoowo. Owo khwira, "Mwatthuna olya, mulyeke owaani."

¹⁰⁹ Ni etthu ekina, khayiiwiwe saana, wira yaari exeeni. Anatampi, ni atthu akhalaka mutampini, yaanirwa ni waakhela ekomunyawu. Nto eyo khayiiwiwe saana. Mulopwana mmosa akhalaka n'ame awe, mai oomukhaliha, nto ekereja yaahimuleela yeeyo; nlelo aakhelaka ekomunyawu vameesa.

¹¹⁰ Ni waahikhala okawanyeya eriyari aya, nave awo nlelo yaanaakhela ekomunyawu. Owo khwira, "Kinnisuwela wira muneetta ntoko Amalapo akina. Ni wookhala—wookhala ohiiwanana eriyari anyu, ntoko sikhanyaaya va—vanci-enexa owannyawe Sefa, ni siiso." Khwira, "Nyubo muneetta ntoko Amalapo akina." Moone, yaari yoohiiwiwa saana.

¹¹¹ Ekomunyawu kweekwe enkhalaka yoohiiwiwa saana. Vano, kaamuwerya okelela ohoolo ni yeeyo iwoora sene, masi nihaana okhalana ekomunyawu ila ni orapiha inawu. Vano awo arookumiha paahi orapiha inawu khuluwiru, ohiya miromolelo vakhani paahi. Anci-ene w'aPentekosite arimwiihuluxa eyo voomalela. Munnona? Ni nlelo eri mBibiliani siiso elempwaaya. Munnona?

¹¹² Vano, Rooma khonihana "ekomunyawu." Awo aniihana "emiisa, emiisa yoowaarya." Awo khanaakhela ekomunyawu, awo anira epantte ya emiisa. Eyo emiisa, nto emiisa vekeekhai enkumiha yoohimya y'ekekhai ya ekomunyawu. *Emiisa* enihimya "muronromelaka." Awo anira epantte ya emiisa, eroromelaka (wira yaairaka yeela vamiisani) wira Muluku onimwaalevelela itampi saya, yaakhelaka "erutthu y'ekekhai ya Kristu, yeeyo namukuttho onrukunxaawe khukhala Erutthu ni Ephome ya Kristu," waakhela yeeyo, eroromelaka wira Muluku onookumiha itampi saya mwaha wo wira siiso. Eyo emiisa.

¹¹³ Maprustante aniihana "ekomunyawu." Ekomunyawu enihimya "oxukhuru." Wira muPrustante...muKatolika oniira epantte ya emiisa, mmiisani ororomelaka wira Muluku onimwaalevelela mwaha wa soowiira saya sootakhala. muPrustante onaakhela ni oxukhuru mwaha wa ele yiiriwe ni ekomunyawu ni Muluku; opatthanaka ni Yoowo, wira ehiiriwa. muKatolika onoororomela wira enimwiiriwa; Prustante onihimya wira ehiiriwa. muKatolika onimwiikoha khama itampi sawe sooleveleliwa; muPrustante onoohimya wira sooleveleliwa, wira owo t'otaphuwa. Ni ekomunyawu onkhala opatthana ni Muluku. Ni malakano ala hiyo ninkuxaahu, kahi mwa *miroromelo* wira itampi sahu sinoooleveleliwa, masi *ti* sooleveleliwa. Okhala wira eyo... Nimosa nroromelo; nto nikina waaminii. Mmosa onroromela wira ori oratteene; nto mukina oosuwela wira ori oratteene.

Munnona? Mukina, mmosa onoororomela, okhala wira owo khonsuwela vamphwanyaneyaawe; mukina onnisuwela wira owo ori oratteene, okhala wira onnisuwela etthu Muluku ohimmyaawe. Ti yeeyo. Eyo t'evirikanelo. Tivo, mwaaroromeleka paahi, mwiikasoope; masi mwaasuwelaka vale, vano mukeleleke oholo. Moone, vano muri moopatthanani ni Muluku. muPrustante ori, owo onihimya wira ooleveleliwa ni onnisuwela; muKatolika orina emiisa, onroromela wira onooleveleliwa. Eri ntoko sa: mmosa namalola, ororomelaka wira sothene siri saana, moone; mukina namalola axukhuruku mwaha wa etthu yiiriwe. Oowaili aya anamalola. Masi mmosa onoolola, ororomelaka wira onimwaakhela; namalola mukina oosuwela wira ohaakhela, ni oomuxukhuru Owo mwaha wo onvaha. Vano, vo ti vari evirikanelo. Eyo ekomunyawu. Ayo, mulopwana. Mmosa onoororomela wira oleveleliwe; mukina aya oosuwela wira ooleveleliwa, ni onooxukhuru mwaha wa yeeyo.

¹¹⁴ Tivo, ekomunyawu ti y'aKristu ayariwe vasya ni Erooho ya Muluku. Ni *oyariwa vasya* khenihimyaxa vano wira muhaana Erooho Yoowaarya. Vano muupuwеле. Vano, anci-ene anixuttiha yeeyo. "Miyo nkimmusuwela mutthu onixuttiha siisa," ntoko mutokweene Munna Arganbright saahimmyaawe ohiy'ule vapulputu va, moone. Masi, oyariwa vasya khuhayo opatiiso wa Erooho Yoowaarya. Yoolempwa khenlipiherya eyo, miyo kinoona wira nnari, moone, wa enamuna aka yo woona. Munnona? Miyo kinnaamini wira nyuwo mooyariwa vasya . . .

¹¹⁵ Ni mwaha wa yeeyo miyo enrumeelaaka nuulumo opatiiso mwa Nsina na Yesu Kristu, masi kahi wa oyariwa waneenli. Vano, Pentekosite, ekereja ya Pentekosite Yowiiraana empatisa mwa Nsina na Yesu wa oyariwa waneenli. Miyo nkinaamini iyo. Ni awo yiireke yaththuna vale. Masi miyo kinnaamini wira Petru ohimmye wira, "Murukunxe murima," toko. Maasi khanlevelela itampi. Ekereja ya Kristu enlaleya siiso. Masi kinnaamini wira orukunxa murima, oriipiwa murima voolikana ni Muluku; *orukunxa murima* enihimya "orukunuwa, otthika," moovonya eninelo ene, "mpacerye-tho." Mwiire yeeyo toko! Ni opatisiwa wanyu mmaasini ohimya paahi ota ya etthu yiiriwe muhina mwanyu, wira nyuwo momukupali Kristu okhala Moopoli anyu.

¹¹⁶ Kinoona wira ekereja va paahi ohiy'ula, ntoko sinsuwelaaka, miyo nkinkhala voophiyerya osuwela t'ani onrwa wala nnari. Miyo kaahuulumiwa vakhani nno woohikhala khalayi mwaha wo ompatisa mulopwana mmosa va mutankini, muulweene mmosa. Vano miyo khurowa wa yoowo, owo aari mulopwana muulweene ooreera murima. Kaahikhala mureerelo wo oweettiherya amusi awe othene wa Kristu, othene aya aKristu. Mulopwan'ola mutokweene aari mutokweene ooreera murima, ni miyo aanikisivela, vano miyo khurowa wa yoowo khumwiirela, "Paapa, muhinkhalela-ni muKristu?" Owo

onnikiphenta.

¹¹⁷ Owo khwira, “Munna Branham, miyo kinookhala muKristu kawerya-ru okhala ooloka voophiyerya.”

¹¹⁸ Miyo khwira, “Kinimooleelani etthu yo wira, Paapa. Nwehawehe mpakha mphwanye vatthu mukhanlyaanyu okhalaka ooloka voophiyerya, vano mukileele nipuro xeeni nlo, ni miyo, kinthuna kirowe.” Miyo khwira, “Kristu khaarwenle owoopola atthu ooloka. Owo aarwenle owoopola atthu ootakhala.” Muupuwelaka-ru wira mwa ooloka, vano Owo khorwenle owoopolani. Owo aarwenle owoopola ale Owo onsuwelaawe wira t’otakhala. Munnona? Kristu okhwenle owoopola anatampi. Munnona? Nto miyo khwira, “Paapa, yookhala eliinya va.”

Owo khwira, “Ahe, miyo kinnaavura asikaro ala.”

Miyo khwira, “Nkinrowa hata olavula yeeyo.”

Owo khwira, “Miyo kiheehererya waahiya, Munna Branham.”

Miyo khwira, “Vaareera, khaninrowa olavula mwaha wa asikaro.”

Owo khwira, “Ahe, kawerya-ru . . .”

¹¹⁹ Miyo khwira, “Muhi—muhihimye-tho etthu ya yaawo, mwaaliyale. Kinthuna kookoheni etthu.”

Owo khwira, “Vaareera, exeeni iyo?”

Miyo khwira, “Munnaamini wira ookhala Muluku?”

¹²⁰ Khwira, “Vekeekhai, miyo kinnaamini.” Khwira, “Miyo kinnaamini siiso ntoko nyuwo, wooma waka, Munna Branham.”

¹²¹ Miyo khwira, “Munnaamini wira Muluku ene yoowo ooviriha nloko Nawe vano khwiipaka erutthu khukhala ni hiyo mwa omutthu wa Yesu Kristu, wira amoopole mutthu?”

Owo khwira, “Ayo, miyo kinnaamini eyo.”

“Ni wira Owo okhwiye wira owoopole anatampi ntoko nyuwo ni ntoko miyo?” Munnona?

“Ayo, miyo kinnaamini eyo.”

¹²² Miyo khwira, “Vano, eri sa. Hiyo othene nri empa emosa yuulupale nno, ni niri mukhatteya, ni nkikhanle weemelaka vanloothoni va ni wira ‘ola onookikhaliherya okhuma mukhatteya,’ kinimweemela vanloothoni vale ni wira ‘ole onookikhaliherya okhuma mukhatteya,’ hiyo othene nri mukhalelo mmosaru. Ni khula mutthu oyariwe molumwenkuni mu oyariwe mutampini, opakiwe mwa sootakhala, orwiiye molumwenkuni oothaka. Owo namakhootta, opacerya wene.”

¹²³ Mutthu mmosa aahikoha nihiku nlo, owo khwira, “Munna Branham, vakhala wira . . . yaamukhala evirikanelo ya Atamu ni Hawa, ni an’aya olelo, vaakhanle wira awo othene khawanre

etthu, yeettaka mu... Yaamu—irutthu saya saamukhala imosaru?”

¹²⁴ Miyo khwira, “Nnari, mulopwana.” Hiyo naatthikela owaani numala oxaya ikhopa, Munna Fred ni miyo, ni anci-ene aya. Miyo khwira, “Nnari, awo khiyaarowa okhala oolikana.”

¹²⁵ Khwira, “Munihimya wira Hawa khaarowa okhala muthiyana ntoko an’awe axithiyana, ni Atamu khaarowa okhala mulopwana ntoko an’awe alopwana?”

Miyo khwira, “Mwa mikhalelo sinci-ene, masi kahi mwa mikhalelo sothene s’erutthu.”

Owo khwira, “Exeeni yaarowa okhala yoovirikana?”

¹²⁶ Miyo khwira, “Awo khiyaarowa okhalanasa mutekhu. Awo yaaroopattuxiwa. Khweeli. Awo khiyaluttanne ni hat’etthu.”

¹²⁷ Vakhalaru wira eyo eniheleliwa othene oniyariwa molumwenkuni mu, enooniherya wira ti yookhotteya, opacerya wene. Eyo ekeekhai. Miyo khwira, “Vekeekhai, yookhala evirikanelo. Awo khiyaarowa okhalana mutekhu. Awo khiyaluttanne ni hata muthiyana, wira erwaase mu.” Moone, Muluku aarimwaapattuxa.

¹²⁸ Vano, miyo khwira, “Kintthuna kihimye etthu. Khula mutthu mukhatteya mu, taani okhanle oowaarya? Taani ohiyariwe mwaha w’ekhapa? Taani onwerya omukhaliherya mukina, hata wira owo exeenii? Hiyo othene nri mukhatteya muumu. Masi Muluku ohiikhaliha mmosa wa soopattuxa Sawe khurwa voohikhala ekhapa, ni Ephome yoowaarya Owo aapattunxaawe Mmansawe, ni mwa Ephome yeeyo Owo khunivuluxa.” Miyo khwira, “Munnaamini yeeyo, Paapa?”

Owo khwira, “Miyo kinnaamini eyo.”

¹²⁹ Miyo khwira, “Kristu omukhwenle mutthu ootakhala ntoko nyuwo. Vano, eri enamuna emosa paahi yo wira. Khiivo hat’etthu mukhanlyaaanyu wiiraka. Owo onnoovahani. Khimukhanle ophwanelaka. Khiyaavo mukhanlyaaanyu wiiraka wira mphwanye. Owo onimoovahani paahi. Munookupali etthu Owo owirenluyaaweni, wira yookhoottiheryeni orowa omooroni?”

¹³⁰ Owo khwira, “Miyo kinimwiira yeeyo.” Owo khwira, “Masi vaakhanle wira kaaniwerya waahiya asikaro ala.”

¹³¹ Miyo khwira, “Asikaro animwiikhapelela mmansaya. Nyuwo paahi... Miyo nkinookohani. Miyo nkihiyo namatthariha ikano. Miyo kinnaamini mahala. ‘Ni Othene ale Atithi akivahalyaaya animoorwa wa Miyo.’” Miyo khwira, “Mwaamini-ru yeeyo ni murim’anyu wothene!”

Owo khwira, “Ni murim’aka wothene, miyo kinnaamini.”

¹³² “Vano nyuwo munookupali muttharihaka yeeyo, wira khamuniphwanelia, masi Owo t’okhanle Ole omphwanelia?

Muhiiweheke nyuwo; munweheke Yoowo, okhala wira khamunwerya wira hat'etthu mmansinyu. Munweheke Ole owiirenleni etthu. Ankhi Yoowo?"

"Oh," owo khwira, "Owo t'ophwanel."

Myo khwira, "Ti yeeyo, vano mukupali etthu Owo onooovahaaweni."

Owo khwira, "Myo kinookupali."

¹³³ Vano miyo khumpatisa mwa Nsina na Yesu Kristu. Nto owo khukhuma va khumpattiha sikaro.

¹³⁴ Isumana vakhani sivinre miyo kaari owannyawe. Kaahikhalana yoowooma ohiyu umosa, ya mwiri mmosa woolekela wiikitthiwaka, woowuuramela vathi. Kaahoona ithaapwa sikhomeliwe vaavo. Epantte ya ethaapwa yookiserya yaahikhala ethaapwa yowooneyaxa. Nto vathi va ethaapwa eyo, vakhiviru va okerekhere, ekhumaka ntoko *sa*, mwiri wanteiye vaavo vene. Nto Nsu nimosa khwira, "Mwaahaana wira mukhanle nyuwo," wala, "Mwaamwiira mukhanle nyuwo." Nto Paapa Cox khumora khuwereeya ettuli awe *va*. Nto siiso voosiisu aya khuruuheliwa asikaro awe oryeene vooilini, otthuna waahimuhiya. Isumana sivinre! Owo khomulawinhe hata mmosa, khommuthuna hata mmosa wala ethu ekina. Munnona? Vano miyo koomoona okathi vakhani ovinre, okathi matat'awe yaaryaaya ookhwila othene, isumana vakhani sivinre, mwaha wa asikaro, nto vano owo khonwerya hata onvilela mmosa okhala vakhiviru ni yoowo. Muhele itthu soopacerya toko! Muhehererye okhala ooloka; nyuwo mwa ootakhala, opacerya wene, ni kiiivo mukhanlyanyu wiiraka. Wookhala mukaano woovalaaniha, ni atthu othene ari epantt'ile.

¹³⁵ Vano, okathi oyariwaaka molumwenkuni mu, waari moothelanani wooreera, w'atithi aka n'amé aka; mmirimani mwaya naahikhala nooce, mwa itthu s'atithi aka yaari erukuruku y'ephome. Ekumi enkhalihiwa n'erukuruku yeeyo y'ephome (kahi ni nooce n'amé aka), ni erukuruku y'ephome y'atithi aka. Nto okathi erukuruku ile y'ephome eronwaaya voopuroni vaya voolikana wira ekumane ni nooce, vairalyaaya, ephattu yaahirummwa ni Muluku wira ekivahé erutthu. Vano nto miyo khuyariwa munlokoni mwa atthu, kivahiwa mureerelo wo—wo okhala mutthu oosuwela ntoko atthu, vaavo kaakhanlyaka weettihaka ekaaro, wala kaakhanlyaka wiiraka itthu ntoko atthu siniiraaya, weetta, olavula, weettiha ekaaro, ni sikina. Kivahiwa yeeyo, okhala wira kiyariwe mw'emusini mwa atthu, ni koovahiwa owerya wo osuwela wira kikhale mutthu.

¹³⁶ Vano, vayariwaaka mw'emusini mwa Muluku, kirwiye ni Ephome, Ephome yookivaha Ekumi. Vano nto vakhanlyaka mukumi mwa Kristu, Owo oopatisa ni Erooho Yoowaarya ni owerya, wira kikhale mwaana a Muluku. Vano, ntoko siiso kaaweryaaka weetta, olavula ntoko mutthu, weettiha

ekaaro aka ntoko mutthu, vano okathi onaakhelaaka Erooho Yoowaarya, kinaakhela owerya wo owoomola axetwani, olavula ilavulelo isya, olaleya Ehapari yooreera, waavoniha aretta. Miyo koopatisiwa! Kahi oyariwa; masi opatisiwa!

Yaathukumanne empa y'osulu,
Othene evekelaka mwa Nsina Nawe,
Awo yaahipatisiwa ni Erooho Yoowaarya,
Ni owerya wo ovvara muteko waahirwa.

¹³⁷ Amen. Nyuwo munaaminela Ekumi Ehinimala, ni muniyariwa vasya mwaha wo waamini wanyu. Yesu oohimya, mwa Yohani Oowaarya 5:24, “Ole oniiwa Masu Aka ni onimwaamini Ole okirumme, ookhalana ekumi ehinimala,” kahi Erooho Yoowaarya, ookhalana ekumi ehinimala paahi. Owo oniyariwa mw’emusini mwa Muluku. Vano nto onoopatisiwa mwa Erooho Yoowaarya, ni owerya wo osuwela wo waamini, waamini Ehapari yooreera ni ohela Yeeyo wira evare muteko ni wiiriha Eyo wira vooreera. Amen. Vano owo oniira ntoko mwaana a Muluku. Vano owo onoowerya owoomola axetwani. Yesu ohimmye wira, “Ithoonyero iya sinimwaatthara!” Munnona? “Mwa Nsina Naka anoowoomola axetwani, anoolavula ilavulelo isya, anoovara inowa, anoowurya itthu siniiva.” Moone, owo onaakhela owerya ni Erooho Yoowaarya, wira aireke itthu iya.

¹³⁸ Vano, okathi oronwaawe, Owo iirale, “Vanreerela Miyo kirowe. Maana, Miyo kaahirowe-ru, Erooho Yoowaarya khenrowa orwa.” Munnona? Vano okathi Owo onrwaawe, Owo onimwaakhupaliha atthu mwaha w’etampi, ni onimwiixuttiha exariya, ni onimooleelan itthu sinrowa orwa (iyo ti soowoona). “Owo onookuxa itthu kwiixuttihaly’akan, ni onoovuupululelani.” Masu ene wira Owo ohoorwa...Khaavo onwerya wiiwa saana Masu ohirina opatiiso wa Erooho Yoowaarya. Ni mutthu aahimyaka wira ohaana opatiiso wa Erooho Yoowaarya, ni onavaanyiha wira Masu aakhalana exariya, yookhala ethu ehilonke.

¹³⁹ Paulo aari namuulumela a Waataana Wa Naanaano. Khaari, Waataana Wa Naanaano kхиwaalempwe. Paulo aari namuulumela a oKristu, Sawuli. Nto vaakhenlyaaawe Erooho Yoowaarya, owo aaronwe miyaakha miraru wAsiya khusoma Soolempwa, okhala wira owo aasomihive ni Kamaliyeli, musomiha muulupale. Vano vatthikalyaaawe, nto miyaakha muloko ni mixexe oholo waya, aahirowa okumana ni Petru oYerusalem, khuphwanya wira awo yaari Masu ni Masu mwa Ehapari yooreera emosaru. Muluku mmosaru yoowo aamwiirinhe Petru olaleya nihiku na Pentekosite ni khwaaleela wira arukunxe murima ni apatisiwe mwa Nsina na Yesu Kristu, Erooho Yoowaarya emosaru yeeyo yaahimuupululela Paulo, vano owo aahaahimeerya mwa Miteko 19 amanle-ene opatisiwa

emaara emosa ni Yohani, khwira, “Muhaana opatisiwa-tho, mwa Nsina na Yesu Kristu.” Munnona?

¹⁴⁰ Moone, Erooho Yoowaarya enkhala voolekana ni Soolempwa. Waamini waya mwa Yeeyo ennithukula khula mwiiriya. Amen. Bibilia oohimya, mwa Yohani Oopacerya 5:7, “Aakhala araru ankhalela onamoona, Wirimu: Atithi, Masu (yaawo aari Kristu), ni Erooho Yoowaarya. Ala araru ari Mmosaru.” “Ni aakhala araru ankhalela onamoona vathi: maasi, Ephome, Erooho. Ala araru kahi mmosaru, masi aniiwaanana mwa mmosa.” Vano, khimukhanle okhalanaka Atithi muhikhalanne Mwaana, khamukhanle okhalana Mwaana muhikhalanne Erooho Yoowaarya; Awo ari Mmosaru. Masi nyuwo pooti okhalihwa naxariya muhikhelanle ooreerihwa, vano pooti oreerihwa muhikhalanne Erooho Yoowaarya. Oreerihwa onkhala ni Ephome, mwa Ephome enoorwa Ekumi. Munnona? Nto Erooho Yoowaarya ti owerya wa Muluku, moone, owerya ovahiwe ekereja.

¹⁴¹ “Munimwaakhela” (exeeni?) “owerya,” Miteko 1:8, “nuumala yeela Erooho Yoowaarya enimookhuruwelani. Munimwaakhela owerya!” (Kahi “munooyeriwa vasya.”) “Munimwaakhela owerya nuumala Erooho Yoowaarya wookhuruwelani. Nto munookhala anamoona Aka oYerusalem, oYuteya, ni oSamariya, mpakha omalenle elapo.” Munnona? Nyuwo munaakhela owerya vanaakhelaanyu Erooho Yoowaarya. Masi yoopacerya muhaana waakhela Erooho Yoowaarya, nto iwo owerya wa Muluku, moone, wira mooniherye ni muthoonyerye. Nyuwo mwa—nyuwo mwa...okhala wira mwaari mutthu, nto khwiixutta olavula ni weetta ni wira itthu mutthu siniiraawe; okathi onipatisiwaanyu ni Erooho Yoowaarya, munivahiwa owerya wira mwiireke ntoko aana alopwana n’athiyana a Muluku. Khivanxankiha atthu wiiraka ni opakaka ntoko siniiraaya olelo, awo khanatoko osareya Erooho Yoowaarya. Yaasareiye-ru, yaamwiira voovirkana. Awo anihimya wira aakhalana, masi Yesu ohimmye wira, “Ni mihokorokho saya munimwaasuwela.” Vano muniwerya sayi wira yeeyo, moone, eyo ti yootepanyeya tu. Munnona? Masi nitthikeleke sookhumelela!

¹⁴² Vano, nyuwo mweettaka oratteene ni wiihimya okhala muKristu, hiyo ninnoolattulani ohiy’ula vameesa v’Apwiya. Olelo, voohihoverya, ekomunyawu ehaakheliwa elapo yothene, akina mwa enamuna emosa ni akina mwa ekina. Masi kinoona wira enamuna yooreera wira onkhala otthara Soolempwa, voolekana ntoko awo siiralyaaya mwa Soolempwa. Kinoona wira eyo yaamukhala yoophiyerya.

¹⁴³ Mookhalana Bibilia anyu, Munna Neville? Munna Neville vano onoosoma Soolempwa.

[Munna Neville oniira, “Kapiitulu 11 y'a Korinto Oopacerya, opacerya versiikulu 23:”—Mol.]

[*Okhala wira kaakhenle wa Apwiya yeeyo-tho kiwiixuttihalyaakani, Wira Pwiya Yesu ohiju yoole waavarahiwaawe aahikuxa mukatthe:*]

[*Vano nuumala oxukhuru, aahikawanya, khwira, Mukuxeke, mukhuureke; ela ti erutthu aka, enivahiwaanyu nyuwo: mwiirke iya mukuupuwelaka miyo.*]

[*Siiso-tho vaamanle-aya olya, aahikuxa ekahi, airaka, Ekoopho ela ti waataana wa naanaano mphomeni mwaka: mwiireke yeela, ikwaha sothene nyuwo munwuryaanyu, mukuupuwelaka miyo.*]

[*Tivo okathi wothena munikhuraanyu mukatthe ola, ni munwureryaanyu ekahi ila, munilaleya okhwa w'Apwiya mpakha vanrwaya.*]

[*Tivo ole onikhuura mukatthe ola, ni onwurerya ekahi ela y'Apwiya, ahiphwanelaka, onnitthekela erutthu ni ephome ya Apwiya.*]

[*Masi khula mutthu apaceryeke okoha murima awe, nuumala akhuureke mukatthe owo, ni awuryeryeke ekahi iyo.*]

[*Okhala wira ole onikhuura ni onwurya ahiphwanelaka, onikhuura ni onwurya ehukhumu awe, ahithokoreryaka erutthu y'Apwiya.*]

[*Vano mwaha wa yeeyo anci-ene ari oohilipa ni aretta eriyari anyu, ni anci-ene anrupa.*]

[*Okhala wira hiyo naaiphuka mmansihu, khinaaphukiwa.*]

[*Masi okathi nimpukiwaahu, ninnittharuxiwa n'Apwiya, wira nihihukhumwe vamosa ni olumwenku.*]

[“Apwiya areerihe osommwa wa Masu Aya.”]

¹⁴⁴ Kweekwe ethu yoowaaryaxa, etthu yooreerihiwa, kookupali wira nihaana wuurama muru vano nivekelaka voomaaleleya. Mukivekelele, miyo kinimoovekelelani. Nrowe nivekelelane mmosa ni mukhw'awe, wira Muluku animorele ikharari hiyo soopattuxiwa soohiphwanelu ninhalela wira mpantte wa eskamento ela yuulupale nuupuwelaka okhwa wa Pwiya ahu.

¹⁴⁵ [Munna Branham onimweemela mwaha wa mavekelo oomaaleleya. Nipuro vahitthu mufitani—Mol.] Nivekelo nla na olapa hiyo ninoovahaahuni Nyuwo, Tith'ihu, vasulu v'altari Anyu a weero, ni Mukuttho ahu, Pwiya Yesu. Hiyo ninvekela mwa Nsina Nawe. Amen.

¹⁴⁶ Vano kookupali wira mahumu anookuxa opuro aya, ni awo anoo...wa ekereja, ni animwaaruuhu atthu okathi awo anrwaaya, eliinya ti eliinya, vakomunyawuni. Kweekwe kinuupuwelaka nsipo nle:

Mwaapwittipwithi oophenteya okhwiye,
 Ephome Anyu yooreerexa
 Khenimala owerya waya,
 Mpakha Ekereja yothene yoovuluxiwa ya
 Muluku
 Woopoliwa, wira ehitheke-tho.

Nrowe nuuramihe muru.

¹⁴⁷ Tithi oomoriwa ikharari ni Oowaarya, Yehova, Oowerya sothene muulupale, nveleelihe iparakha Sanyu mw'atthu Anyu okathi onlipelelaahu. Mulevelele itampi sahu. Nto vano hiyo ninnoovahani Nyuwo esakaramento ela, eviinyu ila, iwuua saaliwe, nto matata a arumeyi khunyakatta. Ni khupakiwa eviinyu wa niwoko vano ninruuhelaahu wa Nyuwo, wira eyo ethoonyerye Ephome ya Pwy'ahu Yesu Kristu. Miyo kinoovekelani Nyuwo, Tithi, wira mureerihe eviinyu ni niwoko nenlo. Mulevelele khula etampi ahu. Ni wira khula mutthu onaakhela eviinyu ela mw'erutthuni mwawe, akhalane ekumi, ikuru, ni woopoliwa wa Nyuwo. Munivahe, Pwiya. Hiyo ninvekela mwa Nsina na Yesu. Amen.

¹⁴⁸ Bibilia ohimmye wira okathi Owo okawannyaawe mukatthe khureeriha, khwira, "Mukuxeke mukhuureke, ela Erutthu Aka munvahiwaanyu. Mwiireke ela mukuupuwelaka Miyo." Nto hiyo naakuxaka mapattuuxa ala makhaani a mukatthe, kosher, onipakiwa woohikhala miropo, onipakiwa ni aKristu, owo onipakiwa okhala wira eyo—eyo enthoonyerya Erutthu ya Kristu. Hiyo noosuwela wira—wira yaari awiixutti a nihiku na Kristu, ahiiso nihiku na ekereja, yaakuxale mapattuuxa ala khupaka yoolya woolyaani wookiserya, woolyaani wookiserya wa Kristu. Ni mBibiliani, yaari awiixutti yaarumeela ithtu iya atthu. Nto olelo, awiixutti ahu a vano, axinn'ihu va a ekereja, awiixutti a Niwoko nenla, annaarumeela atthu. Ni awo anookuxa mapattuuxa ala yaavahe atthu.

¹⁴⁹ Nto vano mwaakhela mukatthe ola, muupuwele, owo onimuthoonyerya Mwaapwittipwithi. Miyaakha sinci-ene sivinre okathi mwaapwittipwithi a Isarayeli ooxiwaawe vamooroni, ni khukhuriwa vamosa ni malaxi oowaawa, atthu yaahikhalana ikuru; ixapattho saya khisaathaanle, ikuwo saya khisaathaanle, mukwaha wothene mpakha awo ophiya muttethe aya wa natiri. Muluku anisuke n'ekumi, oohakalala, nimurumeelaka Yoowo mpakha niphie Muttethe wa Natiri Owo onivahalyaawe.

Nivekele.

¹⁵⁰ Tithi a Wirimu oomoriwa ikharari, okathi onlavulaaka ohiy'ula sa Erutthu ele Yoowaarya, yooreerihiwa ya Pwiya ahu, mwa Yoowo mwaakhala omalela wa oMuluku, kuupuwelaka Erutthu iyo evulalihiwaka ni—ni ekuphuliwaka, nto Ephome ekhwalalaka, ettuli Awe ni iparari Sawe sooneyaka, miwaxuxo osulu ni vathi ottuli Wawe, kuupuwelaka mukatthe ola wooturuwa, ni woomaniwa ommuthoonyerya, eyo ennoorwa-tho mmurimani mwahu, ninnihela murim'ahu, Pwiya, vasulu va altaari Anyu ohiy'ula. Munilevelele, O Muluku. Ni mukatthe ola woopwexakasiwa, waakelaka, mwaano mwa arumeyi Anyu ala, ni esuwele wira yaari Erutthu Anyu yooreeraxa yaanyakattiwe ni yaahaaxiwe, nto ni makhwatta hiyo noovonihiwa. Munivahe, Pwiya. Mureerihe mukatthe ola kosher wa niwoko ontthuneliwaaya. Hiyo ninvekela mwa Nsina na Yesu. Amen.

Mulipelele vakhani.

¹⁵¹ Kehiyo ekomunyawu yoowaliwa. Khula mulipa-oowaamini muKristu pooti orwa vameesa v'Apwiya, wira okhalane opatthana nno ni hiyo...?... 

EHULELO YA MUKHORA EMK62-1007
(The Key To The Door)

Mutthak'ola wa Munna William Marrion Branham, opaceryawene olaleeriwe ni Enkelesi Ttiminku ohiyu, mahiku yeettaka 7 mweeri wa Outubro, 1962, oBranham Tabernacle oJeffersonville, Indiana, wAmerika, okuxiwe wo okaravariwa mufitani ya makineti khulempwa wothene ni nttaava n'Enkelesi. Otaphuleliwa nno mw'Emakhuwani okhumicheriwe ni okaiwe ni Voice Of God Recordings.

EMAKHUWA

©2024 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Olopola mwaha wa ihaakhi sa mwaneene

Ihaakhi sothene sinnaakiheriwa. Eliivuru ila pooti otthittiwa owaani wira mutthu arumeele wala okaiwa, voohilinvwa etthu, ntoko ekaruma y'olaleerya Ehapari yooreera ya Yesu Kristu. Eliivuru ila ehitumihiweke, otthittiwa eyaattelo yuulupale, oheliwa muwepisaiti, oheliwa moothukumanyiwa wira ekuxiwe-tho, otaphuleliwa ni mattaava makina, wala orumeeliwa wira ophwanyiwe musurukhu vahikhanle n'utthuniheriwa woolempwa ni Voice Of God Recordings®.

Mwaaphavelaka wiiwa-tho wala ikaruma sikina sikhanle, xontte mulavule ni:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org